



# WANTOK



Namba 1833  
Wan Wik, Septemba 24 - 30, 2009

Niuspepa Bilong Yumi Ol PNG Stret! K1 tasol  
long olgeta hap

Tupela long olgeta faivpela bisnis save kisim askim long mekim pasin korapsen - p3



'Stopim Australia eid mani' - Wenge Mekim pipel i kamap les manmeri - p5



Enga kalsa senta i sanap makim we bilong holim strong pasin tumbuna - p6

Kopi i gat strong olsem gol, wel na ges - p25



## MAN O DIWAI?

KAUNIM: Dispela man em namba wan longpela man long wol. Nem bilong em Sultan Kosen, na em bilong kantri Turkey (Teki). Ol opisal bilong Guinness Buk ov Wol Rekods i traim sekim longpela mak bilong em long Nu Yok long Mande dispela wik. Ol i makim na tok longpela bilong Kosen inap long 8 fut 1 ins (em 246.38 sentimita o 2.46mita). Dispela i mekim em namba wan longpela man long wol we i stap laip yet. (AP Poto i kam long AAP Images)

Toktok longpela taim long nait nau go Bikpela!

Nau yu inap ringgo long ol mobail fon na len lain wantiam!



Ringim husat i gat Digicel mobail fon o len lain insait long PNG long 11-toea tasol long wanpela minit stat long 11-kilok nait, na nau igo inap 7-kilok moning! Na tu, salim text igo long husat lain igat Digicel mobail fon long 1-toea tasol namel long 10-kilok long nait na 7-kilok long moning.

**Digicel**

Mobil, 200-pela nua Taim Bilong PNG

Dispela promosen i kam long ol Digicel kastoma tasol. Digicel Tems na Kondisen i stap.

**bemobile Kap**  
**Posta insait!**

**Fevret pilai bilong yu long bemobile Ragbi Kap Resis!**

**Katim na stikim long haus wol bilong yu!**

**Lukim long Pes 29**



## OCEAN BLUE TUNA

*Gutpela abus tru na i no dia tumas!*



# Yuwi tok tenkyu long Somare

Paul Zuvani i raitim

SIR Matiabe Yuwi i tok tenk yu long Praim Minista Gren Sif Se Michael Somare long bringim kantri i kam inap long dispela taim.

Em i tok God Papa i makim Se Michael long em i stap lida na i nogat wanpela man inap senisim em isi.

Em i tok nupela man bai kisim ples bilong Se Michael taim em i pinis long wok politik. I no long taim em i stap yet.

"Se Julius i traim na (Paias) Wingti i traim wankain olsem Rabbie Namaliu, (Se William Skate) na (Se) Mekere Morauta tasol ol i no inap."

"Sapos God i makim man, nogat wanpela man bai senisim yu."

"Na Somare em Bikpela yet i makim na olsem em bai stap inap

em yet i pinis long wok politik."

"Mi tok amamas na tenkyu poroman long gutpela save em God i givim long yu," Sir Matiabe i tok.

Em i tok i tru kantri i bungim planti traim tasol em i no pundaun namel long dispela 34 krismas.

Long taim kantri i kisim Independens nogat planti save-man tasol nau i gat planti.

I gat ol dokta, loya, akaunten, enjinia na ol arapela lain olsem ol pilot husat nau i ronim na kamap lida bilong ol kampani long nara-pela kantri.

Em i tok dispela em i bikpela senis.

Em i tok nogat wanpela kantri i bin ron gut long kamap gut olsem em i stap.

"Planti mas go wantaim kain kain hevi na salens na olsem mipela yangpela kantri i bihainim

dispela rot tasol."

"Taim mipela i luksave bai mipela i stretim dispela ol asua na wokabout gut gen."

"Na Somare i stap long gutpela taim long lukim dispela ol senis i kamap."

Em i tok Bikpela i blesim dispela kantri wantaim planti samting na sapos mipela i lukautim gut mipela inap kamap gut.

Tasol em i tok lukaut long ol sik olsem kolera nau i kamap long sampela hap bilong Morobe Provins.

Em i tok dispela sik i no gutpela long wok developmen na i no gutpela long dispela taim we kantri i gat inap save long rot bilong stap helti.

"Gavman i mas pasim dispela sik hariap long wanem em i ken bagarapim planti laip long sotpela taim," Se Matiabe i tok.

## Nawae manmeri noken paul long opis

Paulus Tali i raitim

OL manmeri long Nawae ilektoret long Morobe Provins i mas save long distrik opis bilong ol.

Ol i noken paul na go long ol opis we i no bilong ol, Memba bilong Lae na namba tu Oposisen Lida Bart Philemon i tok.

Mista Philemon i mekim dispela tok bihain long planti taim ol manmeri bilong Nawae ilektoret i go long opis bilong em na askim long kisim helpim.

Em i tok i tru Nawae ilektoret i no stap gut long wanem em i bruk tu hap. Wanpela na arapela hap i stap long sait bilong Lae ilektoret. Lae ilektoret i luk olsem i stap namel.

"Mi laik tok klia olsem Nawae ilektoret i kisim hap long 12 Mail na go long Nadzab ples Balus na narapela hap i go long sait bilong Bukawa."

"Tasol dispela i no ken mekim ol i paul long hap ol i mas go long em," Philemon i tok.

Em i tok Gavman i givim inap mani long wan wan ilektoret na Memba bilong ol Timothy Bonga i kisim mani olsem K10 milien pinis bilong Distrik Sevises Impruvmen Program (DSIP) fan.

Dispela mani i bilong helpim Memba long wokim rot, haus sik, skul, bisnis, lo na oda, komyunikesen na pawa na olsem ol i mas lukluk long Bonga long helpim ol.

"Long sampela as Gavman i no



SAVE GUT: Bart Philemon, namba tu Oposisen Lida.

givim mipela Oposisen mak bilong mani (K14 milien) bilong DSIP em i makim long wan wan ilektoret."

"Na olsem mi wet yet long kisim dispela mani."

"Wanem mani bai mi kisim na helpim ol long sevis ol i askim long em."

"Mi hop olsem Gavman long gutpela na stretpela tingting bai mekim samting em i mas mekim. Em long em i givim mipela dispela DSIP mani we mipela bai mekim wok long em," Philemon i tok.

Em i tok nau yet em i ronim opis long liklik takis mani em i kisim long ol manmeri bilong siti.

Na dispela mani inap long helpim ol manmeri bilong siti tasol na long Lae ilektoret.

## Sialum laikim taun menesa Paulus Tali i raitim

OL manmeri bilong Sialum long Tewai-Siassi Distrik long Morobe Provins i paul long hap ol bai kisim helpim long em.

Dispela em bikos bipo taun menesa i lusim taun long 9-pela mun i go pinis.

Long kisim helpim long kago bilong stua o kisim marasin ol i save long Finschafen Distrik na kisim helpim.

Ol i ken go long Siassi tasol bikos long solwara na olsem ol i painim hat liklik.

Mausman bilong Sialum Lokol Level Gavman Terry Moses i tok ol pipel i no wanbel long pasin em menesa i mekim long ol.

Ol i bin askim lokol Memba Vincent Michaels tasol inap long nau nogat wanpela samting i kamap bilong bringim bek dispela menesa o kisim nupela menesa long go mekim wok.

"Mipela i laik mekim wok na kisim sevis."

"Mipela i no inap kisim taim mipela i gat hevi olsem."

"Inap long lokol Memba o Provinsel Edministreta i hariap na helpim mipela?" Mista Moses i tok.

Em i tok planti rot i bagarap na oltaim ol i save wokabout. Sapos nogat ol i ron long dingi na go long Finschafen o Wasu.

Em i tok dispela em i wanpela kliapela piksa long as ol sevis i no go long ol manmeri.

"Sapos dispela menesa i stap nating, em i kisim pe yet o nogat?"

### OXFORD, TOK PISIN INGLIS DIKSENERI

Katim, na pulimapim oda form daunbilo na salim i kam long Wantok Niuspepa sapos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim. Dispela buk i ken helpim yu tanim Tok Pisin i go long lnglis, o lnglis i go long Tok Pisin. Hariap na kisim wanpela bilong ol dispela gutpela buk we inap strongim Tok Pisin bilong yu.

### ORDER FORM

TITLE	ISBN	PRICE	QTY	SUBTOTAL
PNG Tok Pisin English Dictionary	9780195551129	K18.50		
				TOTAL
				ORDER TOTAL
				CASH TOTAL

- Options for Payment
- 1) Visa / Mastercard / Account / Credit / Debit
  - 2) Mail / Internet / Retail / Telephone / Fax / E-mail / (082, 9400) / 603
  - 3) Call Centre / Office / 22, Sorcery / 24, Malawa / 25, Newen / 26, 407

Account Name: Wood Publishing Company Ltd  
 Account Number: 100 000 5180  
 Bank: Bank of South Pacific Ltd  
 Branch: Donnybrook Centre  
 Branch Code: 0001  
 Swift Code: BOSPNG24

FAX BACK TO: (675) 325 2579

If you are ordering more than one copy please order via the website.  
 Phone (675) 325 2579  
 Fax (675) 325 2579  
 Email: woodpub@total.com.pg

Name (print) \_\_\_\_\_  
 Address (print) \_\_\_\_\_  
 City \_\_\_\_\_  
 State \_\_\_\_\_  
 Postcode \_\_\_\_\_  
 Email \_\_\_\_\_



Australian Government  
Department of Veterans' Affairs

Yu bin halivim ol Australia soldia manmeri long Papua Niugini long Wol Woa 2? Yu wanpela Pasi Wasi Angel o meri o man bilong wanpela Pasi Wasi Angel?

Long luksave long halivim ol Papua Niugini manmeri i bin givim long ol sevismanmeri bilong Australia long Wol Woa 2. Gavman bilong Australia i kamapim Pasi Wasi Angel Komemorativ Medol. Long aplai long kisim dispela medol, plis ringim Australian Hai Komisaris long telepon namba 325 9333, o salim pas i go long Locked Bag 129, Waigani NCD, o sekim websait [www.dva.gov.au](http://www.dva.gov.au)

Dispela Pasi Wasi Angel Komemorativ Medol em i no kam unim long Ura na Awods sistem bilong Australia, na i nogat moni mak bilong en. Dispela medol em bilong ol Pasi Wasi Angel lasol, o ol man o meri bilong ol Pasi Wasi Angel i stap laip yet. Em i no inap long go long ol arapela wan famili bilong ol.

**Guria i sekim taun bilong Vanimo na Wewak**

WANPELA guria i sekim pinis nambis rijen bilong Papua Niugini. Dispela 5.5 strong guria i bin kamap 51 kilomita aninit long graun namel long Vanimo na Wewak. I no gat ripot i kamap long ol samting o man i kisim bagarap.

# Tupela long faivpela bisnis kisim askim bilong mekim korapsen: TIPNG painimaut

TRENSPERENSI Intanesenel long wol i painim olsem tupela long faivpela bisnis i kisim askim bilong mekim korapsen.

Ol i kisim askim long ol pablik opis taim ol i laik mekim kontrak wok bilong ol pablik samting.

Dispela ripot i kamap ples klia taim TI i lonsim 2009 Globel Korapsen Ripot (GCR) bilong em long dispela wik.

Long dispela as Trensperensi Intanesenel PNG (TIPNG) i askim ol manmeri long putim bikipela was.

Em i tok dispela ating i liklik ap bilong bikipela hevi we i stap.

TIPNG i askim sivil sosaieti na gavman long wokbung na pait egensim dispela pasin nogut.

TI i painim olsem bikos long kain pasin i kamap inap olsem 10 pesen bilong kos bilong mekim wok bisnis i go antap.

Em i painim tu olsem ol opisa husat i stap long pablik opis i save givim kontrak long ol husat ol i save long praivet sekta.

Na dispela as ol i no save bihainim gutpela na strepela rot bilong mekim wok bisnis na sas bilong ol kago na sevis i go antap.

Wantaim dispela ol gavman taim i

save mekim disisen i save bihainim tingting bilong wan wan kampani ol Gavman i save kisim helpim long kago na sevis samting long mekim disisen i bihainim laik bilong dispela ol kampani.

Na dispela aninit long gutpela pasin i no stret na i daunim pasin na lo bilong dimokrasi.

TIPNG nau i askim praivet na pablik sekta wantaim long wokbung na pait egensim dispela kain pasin.

Em i tok sapos nogat dispela bai daunim olgeta gutpela wok bilong dimokratik gavman.

TIPNG i kamapim pinis sampela samting long bihainim tingting bilong TI

long wol na dispela i stap long 2009 GCR.

Dispela kain i lukim kamap bilong Bisnis Egens Korapsen Alaiens (BACA) long wok bung wantaim Komes na Industri Samba bilong Mosbi na sivil sosaieti olsem Indipenden Komisen Egensim Korapsen.

Em i kamapim tu Fores Gavanens Integriti program long Esia-Pasifik rijen na ol arapela programs.

Global Korapsen long dispela yia i lukluk tu long PNG na helpim tu Nesenel Risets Institute (NRI) long wok bilong em.

# Ol birua kilim bisnismen

**Bustin Anzu i raitim**

wanem as na ol trabelman i mekim dispela kain pasin long tupela brata.

Ripot i kisim polis i tok dispela bisnismen wantaim brata bilong em i lotim kopi bag long Menyamy na kam daun long Lae. Ol birua i bihainim tupela kam na kilim tupela namel long Gabensis na Wampit, arere long haiwe bilong Wau na Bulolo.

Dispela kar, wantaim kopi bag na bisnismen, em ol i pusim igo arere long rot taim polis i go painim bodi bilong em long las wiken. Bodi bilong dispela bisnis man nau istap long Angau haus sik.

I gat wanpela pis tim nau i wok long dispela hap ples long stretim dispela hevi.

Long wankain taim tu, polis long Lae i painim bikipela namba

bilong marijuana long las wik.

Polis i bin kisim ripot olsem tupela man long Hailans i laik karim dispela ol smok nogut i go long Kimbe, Wes Nu Briten Provins.

Taim polis i go sekim ol pasindia, husat i laik kalap long MV Madang Queen, ol i holim pasim dispela tupela bilong Isten Hailans Provins wantaim 13.8kg bilong marijuana, we strit prais bilong em stap olsem K100, 000.

Tupela bilong ol dispela plastik marijuana em olsem pilo bilong slip. Ol i bin pasim gut tru na putim i go insait long beg bilong ol na laik kisim i go insait long sip taim ol drag skwat bilong polis na ol risevis i holim pasim ol. Tupela i go long kot long Lae distrik kot.



**HOLIM PASIM:** Ol polisman long Lae i soim aut ol marijuana we ol i kisim long las wik Fraide long Lae.

**Poto: Bustin Anzu**

**ATTENTION OIL PALM MILLS, TIMBER MILLS, FLOUR MILLS, INDUSTRY ELECTRIC MOTORS, DRIVES & TRANSMISSIONS**

- \* Italian Made Power Transmission
- \* Hollow or Solid Shaft Designs
- \* Low Speed Applications
- \* Sealed For Life
- \* Alloy Light Weight
- \* Special One-Off Designs

- \* High Cycloid Efficiency Speed Reducer
- \* Solid Drive Shaft
- \* High Torque Outputs
- \* Low Maintenance
- \* Italian Made

Fully supported by in-house technical representative who can answer all your motor requirements, email: sean.sill@bishopbrothers.com.pg

| Phone: 300 46 | Fax: 300 47 | Email: honsales@bishopbrothers.com.pg | Website: www.bishopbrothers.com.pg

**BISHOP BROTHERS**  
everything for industry...

# Bung bai kamapim gutpela win: PM

**HAT bilong san na simuk nogut i bagarapim planti hap bilong kantri long dispela taim.**

Na ais long kol ples i wok long lus klostu klostu na nogat wanpela gutpela rot i stap bilong pasim dispela kain senis.

Dispela em wanpela ripot we i kamap long wanpela bikpela kibung bilong Klaimet Senis long Nu Yok siti, Amerika.

Na Praim Minista bilong mipela Se Michael Somare wantaim Envaironmen na Konsevesen Minista Benny Allen i stap tu long dispela kibung.

Dispela kibung i bilong redim ol lidaman long kamap bilong bikpela tru kibung long Kopen-

hagen long Denmak long Disemba bihain long dispela yia.

Ol lidaman i hop olsem wantaim dispela ol kibung ol bai helpim long daunim mak bilong simuk nogut i go antap long klaut na daunim hat bilong san i kisim graun.

Simuk nogut em ol fektori i save salim i go antap.

Na wok bilong katim bus na diwai i save daunim mak bilong gutpela win we ol diwai i kamapim bilong ol man na abus i pulim na stap.

Se Michael husat i wanpela bilong tupela namba tu presiden bilong Reinfores Kolisen Nesen bilong ol kantri nau bai pait long wok bilong daunim

katim bilong simuk long nogut i go antap na pasin bilong katim na bagarapim bus (Reduced Emissions from Deforestation and Degradation-REDD).

Em i tok kain wok i bikpela samting na i hat long ol lidaman i abrasim long givim sapot bilong ol.

"Sapos mipela i laik wokbung wantaim long trupela spirit we i bungim olgeta kantri long helpim graun long bihain taim orait mipela i mas stat nau long mekim samting."

"Mipela olsem wanpela memba i stap olsem siaman bilong renfores kolisen bilong ol nesen i mas lukim olsem mipela i rausim pasin bilong

katim diwai na bus long nem bilong developmen."

"Mipela i mas was long bus graun bilong mipela na painim narapela ol rot long sapotim laip bilong mipela," Se Michael I tok.

Em i amamas tu long hetman bilong ol arapela kantri olsem Nowei, Guyana, Australia, Kosta Rika na Brajil long ol i tokaut long sampela ol mak nogut hevi bilong klaimet senis i kamapim na i kamapim ol tingting tu bilong stretim dispela hevi.

Em i amamas tu long Alaiens bilong ol Liklik Ailan kantri (AOSIS) Lida's Samit long Klaimet Senis husat i givim



**DAUNIM HEVI:** PM Se Michael i askim ol kantri long wokbung na daunim hevi bilong klaimet senis.

bikpela sapot bilong ol long dispela kibung.

Na i tok amamas tu long Seketari Jenerel bilong Yunaitet Nesen Ban Ki Moon husat i mekim sampela ol gutpela wok long sapotim wok bilong daunim mak bi-

long smuk i go antap na pasin bilong bagarapim bus na solwara bilong mipela.

Em i tok Embeseda Moon i mekim gutpela wok na olsem mipela i mas givim sapot long em.

## 'Kirapim bek ol risev polis' - Amet

**Michael Novingu i raitim**

POLIS long Madang i nogat inap wokmanmeri, ol samting bilong wok olsem kar, piul, na ol arapela samting long karimaut wok bilong ol na raskol pasin i go antap long Madang provins.

Gavana bilong Madang i mekim dispela toktok long wanpela midia konpres long Madang las wik.

Se Arnold i tokim ol niustain olsem polis long Madang i nogat ol samting bilong wok, i lukim planti raskol pasin i kamap long Madang i bagarapim sindaun bilong ol manmeri.

Em i tok, em i askim minista i bosim wok bilong polis long kamapim gen wok bilong risev polis long kisim ol risev long Madang long helpim polis long karimaut wok bilong ol long wanem nogat inap polis manmeri long Madang.

Se Arnold i tok ol bikpela wok bisnis i kam insait long

provins long kisim developmen i kam. Ol manmeri long arapela provins, rurel ples long Madang i kam long painim wok.

Taim nogat wok ol i painim hat na wokim pasin nogut long lukautim sindaun bilong ol.

"Madang provinsel gavman bai karimaut wok painim aut long husat i wokmanmeri, husat i stap nating na kirapim raskol pasin mipela bai askim ol long kirapim lusim hap ol i sindaun long en long go bek long asples bilong en," Se Arnold i tok.

Se Arnold i no wanbel long planti manmeri ol i kilim ol long dispela mun, hol u p pasin ikamap long ol bisnis haus ikamap long madang long dispela mun.

Em i askim ol manmeri long Madang taun long wokbung wantaim polis na provinsel gavman long kirapim gutpela sindaun insait long ol komyuniti long Madang.



**WARI:** Mista Gimbo i wari long AIDS nogut i bagarapim ples bilong em. *POTO: Andrew Molen.*

## Bundi laikim AIDS aweanes

**Andrew Molen i raitim**

SIK nogut HIV AIDS i go insait long Bundi LLG long Madang provins na kaunsela bilong ol i laikim sampela wok aweanes na skul long dispela sik i mas kamap long hap.

Kaunsela, George Gimbo i tok dispela em wanpela nupela samting long hap na em i wari long ol manmeri bilong em.

"Bipo i nogat dispela sik long ples bilong mipela tasol nau em i go insait na namba bilong en i go antap," em i tok.

Mista Gimbo i bilip olsem wanpela samting we i kisim dispela sik i go insait em ol nupela wok developmen na projek we i wok long kamap long hap nau.

"Kain kain manmeri wok long go insait long hap nau na ol i karim dispela sik i go tu," em i tok.

Mista Gimbo i laik wok aweanes na skul long dispela sik i mas kamap long ol manmeri bipo Ramu Nickel main i go insait long pinis bilong dispela yia long wok.

Em i tok planti bagarap i kamap pinis long ples bilong em taim dispela kain ol wok i go insait na em ino laikim dispela sik i bagarapim ol manmeri tu.

"Mi laik bai nesenel AIDS kaunsil i mas kamapim sampela kain program bilong ol long hap long skulim ol manmeri," mista Gimbo i tok.

Bundi bungim ol arapela hevi tu olsem nogat gutpela rot, gavman sevis na ol pis long wara bilong ol i dai na wara i bagarap long ol marasin i kam long Ramu Nickel main we sampela wok i kamap pinis.

## Goroka taun i bagarap

**Sape Metta i raitim**

KOPI Industri Koporesen (CIC) i askim ol kopi growas long tripela hailans provins nau long holim pas tru wok bilong kopi long wanem bikpela moni bilong gol, wel na ges we ol bikpela maining kampani bai i ken kamapim na long sem taim tu ol bikpela senis na gutpela sindaun long ol viles na hauslain tu bai i ken kamap long olgeta provins long hailans rijen.

Na bosman bilong CIC Ricky Mitio i tok kopi i mas kamap olsem bun tru bilong painim moni bilong kamapim gutpela sindaun long ol lain manmeri long Isten Hailans, Simbu na Western Hailans Provins.

Em i tok ol kopi growa long dispela tripela provins i no holim na mekim gut wok long kopi bilong ol, tru tumas ol i ken kamap olsem kago boi bilong ol lain long Enga na Sauten Hailans provins husat i go ps nau long kisim planti milien kina long gol, wel, na ges long

provins bilong ol.

Mista Mitio itok CIC i kisim luksave long senis we bai i ken kamapim hevi olsem na koporesen i kamap wantaim tingting bilong senisim tu pasin na tingting bilong bungim ol kopi growas long ol i mas bung long ol grup o kamapim asosiesen long kamap strongpela grup long planim na kamapim ol kopi na tu ronim ol kopi bisnis.

Em i tok tu olsem ol kopi growa i gat bikpela graun na bus we ol i ken salim long ol lain husat i ronim ol bikpela projek na tu long ol manmeri long ol provins we wok na developmen bilong gol, wel na ges i bagarapim pinis gutpela graun bilong ol long wokim gaden na kamapim ol kaikai.

Nau yet CIC i gat luksave olsem kopi wankain olsem gol, wel na ges bai i ken mekim planti manmeri long ol viles na hauslain i ken kisim planti moni na kamapim gut sindaun bilong ol.

Na Koporesen i gat strongpela ting-

ing tu olsem rot em i stap long ol liklik manmeri long ol i ken kamap moni lain long wok bilong kopi.

"CIC i kamapim pinis sampela gutpela rot long givim helpim i go long ol smol holda growas long dispela tripela provins. Na tu mipela i kamapim pinis ol nupela tingting na save long putim fan na helpim i go daun stret long ol growas we ol i memba na i stap nau long koporetiv grup ov bisnis long kamapim senis long wanwan growa," Mista Mitio i tok.

Em i tok CIC i bin kisim tasol K3 milien i kam long Nesenel Gavman long stretim gut ol wok bilong kopi we em i skelim i go long dispela tripela provins.

Mista Mitio i tok CIC bai kamapim ol program bilong lainim na skulim na givim trening long ol growas long planim planti kopi na lukautim gut ol kopi ol i gat long en, na long yusim gut ol moni em ol i kisim lonmg kopi.

# 'Stopim Australia eid mani' - Wenge

## Mekim pipel i kamap les manmeri

**Bustin Anzu i raitim**

GAVANA bilong Morobe, Luther Wenge askim nesenel gavman long stopim ol eid mani i save kam long Australia.

Em i tok kantri bilong yumi i gat planti risos, tasol yumi wok kisim dispela eid mani na i mekim ol pipel i kamap ol les manmeri.

Em i mekim dispela toktok long amamasim 34 indipendens bilong Papua Niugini long Lae las wik Trinde.

"Mi laik singautim Praim Minista bilong Australia Kevin

Rudd long rausim olgeta eid mani we em i save givim i kam long helpim wok divelopmen. Tasol dispela i save kamapim les pasin na mekim ol i kisim helpim yet na i luk olsem ol i no strong long ol yet," em i tok.

Em i tok em i mekim dispela toktok long wanem, planti bilong ol dispela eid mani i save go long ol namel man husat i mekim han bilong ol doti long ol dispela kain helpim, husat i korap.

Em i tok ol i save kisim dispela kain helpim long nem bilong divelopmen na i no save mekim wok, taim olgeta nara-

pela manmeri insait long kantri i kisim bikpela bagarap long ol sik we ol inap long daunim.

Em i tok kantri bilong ol i pulap wantaim kain kain blesing tasol ol i no save mekim gut long ol dispela blesing na laik kisim helpim i kam long ol narapela kantri yet.

"Mipela save wet tumas long Australia long givim helpim na bilong wanem na yumi yet i no laik digim graun na askim graun. Planti ol projek i go aninit long tebol na planti i lap wantaim traipela tausen kina," Wenge i tok.

Em i tok tu olsem pasin bi-

long wok korapsen i go bikpela na planti long dispela samting we ol i save wokim em i gat 10 pesen komisn long ol lain husat i save mekim dispela kain wok.

Em i tok sapos ol i stopim ol kain helpim i kam long narapela kantri, em bai stopim dispela pasin korapsen na ol manmeri bai mekim wok bilong ol tru tru. Dispela pasin tu bai daunim korapsen insait long kantri.

Na ol manmeri yet bai sanap long divelopim kantri bilong ol.

### Ol wokman long Kainantu i stap olsem ol kalabus Sape Metta i raitim

OL WOKMAN husat i wok long ol pablik sevis opis long Kainantu, Isten Hailans provins i kamaut na singaut long ol provinsel na nesenel gavman long lukluk na stretim gut ol haus na kamapim gut sindaun bilong ol long distrik.

Na man husat i go pas olsem mausman bilong dispela ol wokman, Michael Ray, i tok haus slip bilong ol i ran daun na bagarap tru na ol i save i stap olsem ol lain long banis kalabus.

Em i tok lukluk tu long prais bilong ol kaikai samting long ol stua na ol arapela sevis em i wok long i go antap na pe em ol i save kisim em i no inap long mitim kos bilong dispela ol samting na sevis.

Mista Ray i tok, 90 pesen bilong ol wokman i no lukim apim long pe mak bilong ol longpela taim tru na dispela i mekim tu na ol i kisim taim.

"Na planti long mipela i stap nau long ol din-au mani. Dispela ol samting i mekim na planti ol wokman i slek long mekim wok bilong ol. Olsem na mipela laikim olsem provinsel na nesenel gavman i mas lukluk long stretim sindaun bilong mipela ol pablik sevis wokman so mipela i ken amamas na karimaut ol wok bilong pablik sevis i go long ol pipel long distrik long gutpela na stretpela pasin," Mista Ray i tok.

### Madang pasim kuk kaikai na aisblok bisnis

**Michael Novingu i raitim**

OL liklik wok bisnis bilong salim ol kuk kaikai na aisblok long sait bilong rot long Madang i pas long traime pasim sik kolera i go insait long provins.

Provinsel Administreta bilong Madang, Joseph Dorpar, i tok olsem provinsel gavman bai pasim ol haus kaikai, stopim ol kaikai ol i kukim na salim long maket, stopim salim long ol aisblok, kolwara na buai daka, nogut em i ken kamapim sik pekpek wara.

Mista Dorpar i bin tokaut long ol dispela long makim indipendens long Trinde las wik.

Em i tok, maski sik kolera o pekpek wara i no kamap yet long provins, ol manmeri i mas harim tok na lukautim ol yet gut.

Mista Dorpar i tok sik kolera na disentri bai no inap kamap sapos ol manmeri i bihainim ol dispela samting.

- Bolim wara pastaim long yu dring;
- Kaikai ol kaikai yu na famili bilong yu i kukim long haus, na noken kaikai ol kaikai long haus kaikai long stua, maket o long sait bilong rot;
- Wasim han pastaim long yu kaikai;
- Karamapim gut kaikai bai lang i noken sindaun long en;
- Yusim toilet long pekpek, na karamapim gut toilet, na noken pekpek long bus.

Mista Dorpar i tok tu olsem waswas long nambis na bikpela wara i tambu bikos planti manmeri i save yusim nambis long toilet.

"Ol haus kaikai long Madang, bai mipela i pasim long sotpela taim long lukim, nogut sik pekpek wara i kamap long ol kaikai ol i kukim na salim," Mista Dorpar i tok.

Em i tok ol helt atoriti long Madang nau i wok long karimaut ol wok aweanes long olgeta hap bilong Madang long skulim gut ol manmeri long daunim dispela sik pekpek wara.

Emi tok ol helt atoriti long madang nau i wok long karimaut awenes long olgeta hap bilong madang long bai y u bihainim long daunum sik pekpek wara.

### Kainantu taun bungim hevi long wara saplai

**Sape Metta i raitim**

OL pablik sevis wokman na ol bisnis komyuniti i tok long kisim planti hevi long mekim ol wok long givim sevis i go long ol pipel long Kainantu distrik, Isten Hailans long wanem i nogat gutpela wara i ron long taun.

Sevis bilong taun wara saplai i bin pas longpela taim na ol lain husat i save i stap long taun em ol i save yusim ren wara long ol tenk na ol bikpela wara long waswas na wasim ol klos bilong ol.

Tasol insait long tripela wik bilong bikpela san, olgeta wara i drai na ol lain long taun i kisim bikpelea taim tru long hevi bilong wara.

Mekim na ol pablik sevis wokman i wok long stopim wok na pasim opis long belo taim so ol i ken i go painim ol wara long yusim long kukim kaikai, dring na was was. Nau yet ol wokmanmeri long Kainantu i bung na ol i pasim tok pinis long kamapim protes mas i go long distrik hetkwota long toktok wantaim ol atoriti long hevi bilong wara so ol i ken traime long lukluk na stretim dispela hevi.

Nau yet wanpela komyuniti lida long Kainantu taun, Jorifa Yubiko i tok olgeta wok na sevis bai i pas olgeta sapos nogat wanpela samting i kamap long helpim ol pipel long kisim wara.

"Dispela em i bikpela hevi olsem na ol bikman long distrik na provins tu i mas hariap long painim sampela gutpela rot long kamapim gutpela wara saplai long helpim ol komyuniti long taun," Mista Yubiko i tok.



OP: Se Temu i opim dua bilong nupela polis stesin bilong Malalaua.

## Polis gat opis long Malalaua nau

**Andrew Molen i raitim**

MALALAUA stesin long Galp provins nau i gat wanpela nupela polis stesin we Deputi Praim Minista, Dokta Se Puka Temu i opim.

Memba bilong Kerema, Pitom Bombom i yusim K1.3 milien aninit long Distrik Sevises Impruvmen Progrem (DSIP) bilong em long mekim dispela polis stesin.

Dispela haus i gat opis long

daunbilo na antap bilong ol polisman insait wantaim tupela rum bilong ol kalabus tu.

Wok i kirap long mun Mas dispela yia.

Ol i kolim dispela haus bihainim nem bilong Sergent James Elavo Feope husat i wok long hap moa long 15 yia na i dai dispela yia tasol bipo long opis i op.

Planti singsing na danis i kamap long makim op bilong dispela polis opis we planti ol bikman i kamap long lukim.

Se Temu i tok, Malalaua i mas gat gutpela polis stesin olsem long was long ol bikhet pasin we i save kamap long rot.

Mista Bombom i tok em bai askim polis komisina long apim namba bilong ol polismanmeri long hap na tu senisim nem bilong en ol ruel polis stesen i go long olsem polis stesin stret.

Polis Komisina, Raphael Baki amamas long sapot bilong Mista Bombom na i tok em bai lukluk long ol askim bilong Mista Bombom.



INO MERI NATING: Bernadette Oni, nes na Ambalens draiva i redi long tekov i go long Panguna

# Bernadette i draivim Panguna ambalens bas

**Veronica Hatutasi i raitim**

SAMPELA ol wok i bin bilong ol man tasol long mekim, tasol nau, ol meri tu i gat save na strong long mekim ol.

Sampela em ol wok olsem pilot bilong sip, kepten bilong sip, dokta, politisen, loya, mekanik na draiva.

Planti meri i PNG i save draiv nau, tasol i no tumas long draivim ol PMV bas, ol ambalens na ol bikipela trak.

Long raun bilong Meri Wantok long Arawa i no longtaim i go pinis, em i bin go kisim nius na ol poto long Arawa Helt Senta, pas-taim Araa Haus sik. Na em i kirap nogut long lukim olsem wanpela meri nes i save draivim

o ronim ambalens bilong Panguna Helt senta. Meri Wantok i bin stori liklik wantaim dispela nes draiva. Nem bilong en em Bernadette Oni. Em i Trinde moning na Bernadette i redi long mekim ron i go antap long Panguna, we i stap 45 minit draiv long ka long Arawa.

"Mi amamas tasol long ronim dispela ambalens bas i go na i kam long Arawa na Panguna. Ol bos long haus sik i gat bilip long mi i wokim dispela wok na long wankain taim tu, mi wanpela nes. Na save bilong mi long sait bilong nes long lukautim ol sik man na me mekim tu wok na along wankain taim tu, mi mbalens bas em mi laikim. Pastaim ol man tasol i save

draivim ol ambalens tasol bau long Bogenvil, ol meri tu i gat nem long mekim dispela wok. Moa yet, long Panguna, ples we i stap antap long maunten na sampela taim, em bai hat bikos long ren na kilaut i karamapim ples. Draivim ambalens bas olsem em mi laikim tasol bikos draivim ka i no nupela samting long mi, mi pilim fit long draiv. Mi draivim Panguna ambalens bas long tupela yia nau na nogat birua i kamap.

"Narapela samting tu em taim man, meri na pikinini i sik long Panguna o ol ples klostu, mi save go kisim ol i kam long Arawa helt Senta," Bernadette i tok.

## Wokbung i mas i stap long Okapa

**Sape Metta i raitim**

PASIN wokbung em i mas i stap strong so ol sevis bai i ken i go long ol distrik.

Na ol wokman long ol pablik opis long Okapa distrik long Isten Hailans provins i ken kisim ol strongpela tok-tok long wok bung so ol wok bai i ken i go gut na ol sevis tu bai i ken i go long distrik.

Distrik edminsitresen i mas putim ap ol plen na wok strong long bringim ol gutpela sevis i go long distrik.

Dispela em i sampela strongpela toktok em Okapa Is Lokel level gavman presiden Andrew Sarapo i mekim long Goroka long wik i go pinis.

Em i tok ol benk, postal na telepon sevis em i go na i stap pinis long distrik hetkwata long Okapa olsem na ol pablik sevis wokas long distrik i mas stap long i go i kam long Goroka taun long wanem ol sevis em ol i laikim long en em i stap pinis long distrik.

Mista Sarapo i tok long kisim ol sevis i go long distrik em i no isi. Olsem na ol wokman na ol lida long distrik i mas wokbung na sevis em bai i ken i go isi long ol pipel long distrik.

## Enga kalsa senta i sanap makim we bilong holim strong pasin tumbuna

**"HISTORI em i bilong kalsa, olsem ol ruts bilong diwai. Sapos yu lusim histori, diwai bai no inap groa gut moa."**

Dispela toktok i kam long Dokta Polly Wiessner, projek lida na wanpela long ol lain i givim ol bikipela toktok long opim bilong nupela Enga Kalsa Senta, nem bilong en 'Enga Take Anda' long Wabag.

Dispela nupela bilding em Minista bilong Kalsa na Turisim, Charles Abel yet i bin opim.

Mista Abel i tok strongim ol pipel long ol i mas holim strong kalsa na tumbuna pasin bilong ol.

Dispela kalsa senta em i namba wan kain ples olsem insait long hailans rijen.

Ol lain Enga yet i bin bungim tingting long kamapim kain ples olsem long lukautim ol kalsa na pasin tumbuna bai ol yangpela i noken lus tingting long en.

Samting olsem wan tausen manmeri na ol



OL I KAM INSAT: Ol bikmanmeri i kam insait long dua bilong Enga Take Anda kalsa senta. (rait) KALSA SENTA: Nupela kalsa senta we PNG Sastenabel Developmen Progrem i sanapim long Enga bilong strongim ol tumbuna bilip na pasin bilong ol.

turis na ol meri bilas na samsam i bin stap long lukim opim bilong dispela senta.

Ol bikmanmeri husat i bin stap em Minista bilong Foren Afes, Sam Abal, Gavana bilong Enga, Peter Ipatas, Sif Eksekutiv Opisa bilong PNG Sastenabel Developmen Progrem (PNGSDP) David Sode, na ol wokmanmeri na ol bikman i kam long Amerika na Australia.

Mani mak bilong sanapim dispela Enga Take Anda senta i sanap long K4 milion, we PNGSDP i bin givim namba wan sapot mani inap long K250,000 long 2007.

Mista Sode i tok kampani i amamas tru long helpim dispela projek long makim ol pipel bilong Westen provins.

"Em i bikipela samting long holim strong kalsa bilong yumi long

wanem, yumi ken yusim long save long ol pasin bilong bipo. Yu no inap save wanem hap yu go long en, sapos yu no save wanem hap yu kam long en," Mista Sode i tok.

Ol arapela lain i bin givim helpim long sanapim dispela senta em Enga provinsel gavman, Traditional Transition Fund (USA) na ol arapela lokol na ovasis patna.

# RAMSI i gat wok yet *Hap namba 8...*

**Bustin Anzu i raitim**

**PLANTI senis i wok long kamap insait long Solomon Ailan bihain long ol i go stap na wok long dispela kantri, we pastaim ol i tok i nogat gutpela lo na oda.**

RAMSI i mekim wok long strongim ol wok bilong ol bipo long ol i lusim kantri na i go bek.

Lo na Oda, strongim ekonomi na lukim olsem gutpela gavman i mekim wok em bikpela as tingting bilong RAMSI na long strongim dispela, planti ol senis i wok long kamap.

Wanpela bilong ol dispela senis em, RAMSI i wok long wokim ol gutpela haus kalabus insait long kantri, wokim haus bilong ol polisman na meri, wokim gutpela rot na strongim ekonomi bilong kantri we, ol i givim tingting long gavman bilong Solomon Ailans long larim ol nupela investmen i go insait long kantri.

Long stat bilong dispela yia, olupela bos bilong RAMSI polis i tok gavman bilong Australia i putim mani pinis long wokim 200 nupela haus bilong ol polisman na meri bilong Solomon Ailans.

Dispela em wanpela bikpela wei ol i helpim polis long strongim wok bilong ol na mekim gutpela wok long lukautim kantri bilong ol.

Na sampela taim i go pinis, ol i opim wanpela nupela haus kalabus long Malaita provins na pulim kolta long sampela rot insait long sampela provins. Dispela em ol wok we RAMSI i gat tingting long mekim.

RAMSI i soim ples klia olsem bipo long ol i lusim kantri, wantaim ol kain program olsem bai mekim kantri Solomon Ailans em wanpela kantri we bai ron gut long bihain taim, taim RAMSI i lusim ol na i go.

Trupela stori bilong lo na oda em i pinis (wan wan i stap tasol i no gat bikpela luksave) nau, RAMSI i laik luksave olsem sampela ol wok em ol asples yet i mas stap papa na mama long ol dispela wok.

Olpela Komanda Denis McDermott i bin tok olsem SBD 104.5 milien o AUD 20 milien dola long ol haus bilong polis.

Dispela mani em bai ol i mekim wok insait long neks foapela yia.

Em i min olsem long olgeta yia, ol bai givim ol \$5 milien.

Long las yia Nu Silan i bin putim mani long wokim 34 haus bilong ol polis aninit long Nu Silan Polis Haus Projek.

Ol tu i kamapim skul na trening bilong ol polismanmeri long kisim moa save na skruim i go. Planti ol polisman husat i bin stap insait long ol trabel, ol i bin rausim ol na namba bilong polisman na meri i go daun.

Olsem na ol i kamapim planti rikrutmen bilong ol nupela lain long kisim ples bilong ol. RAMSI i laikim olsem olgeta provins i mas i gat ol polisman meri i stap long daunim hevi bilong lo na oda na i no olsem bipo, we ol i stap wantaim pret long ol hevi bilong lo na oda.

Insait long dispela program tu, ol i bin salim ol polisman meri bilong ol i go kisim sampela save long Australia na Nu Silan tu.

Dispela i givim strong long ol olsem taim ol i go bek long kantri bilong ol, ol i mas yusim ol dispela save long mekim wok bilong ol.

Long pinis bilong 2006, RAMSI polis i bin Royal Solomon Ailan Polis Fos (Royal Solomon Islands Police Force) samting olsem 30 polis kar long mekim wok bilong ol insait long kantri.

RAMSI polis i bin baim sampela spit bot bilong Solomon Ailan polis tu na givim ol. Dis-

pela em long helpim ol long go long ol ailan polis stesin long polis operesen na ol narapela wok tu.

Dispela ol spit bot i save helpim ol polis long mekim wok bilong ol na tu, sekim ol boda wantaim Papua Niugini, Vanuatu na ol narapela Saut Pasifik kantri.

I no long polis tasol. Long ol narapela wok ples olsem ekonomik developmen, treseri, Fainens na ol narapela gavman dipatmen tu.

Rove haus kalabus tu em ol i bin mekim kamap bikpela na gutpela. Dispela em wanpela bikpela haus kalabus bilong kantri na ol i bilasim dispela haus kalabus gut tru. Olgeta lain husat i save stap long dispela rum gat i gat ol gad o woda, we i save wok wantaim ol ami bilong RAMSI, ol i stap na banisim dispela haus kalabus.

Long Tetera tu, ol i stretim olupela haus kalabus na stretim em gen. dispela em ol i bin bagarapim na kukim long taim bilong ol long pait sampela etpela krismas i go pinis.

Tasol taim haus kalabus long Rove, long biktaun Honiara i pulap, ol i stretim dispela ples na muvum sampela ol trabelman i go long dispela hap.

Na i no long taim, em long dispela yia, ol i pinisim narapela haus kalabus long biktaun bilong Malaita provins, Auki. Olpela haus kalabus bilong Auki em i no luk fit bilong ol kalabus manmeri long stap na ol i rausim na wokim nupela gen.

RAMSI tu i stretim ol sampela rot insait long kantri tu. Ol dispela rot em pastaim i bin stap gut tasol bihain long pait bilong ol yet, planti rot insait long kantri i bagarap.

RAMSI i luksave long dispela problem na putim planti mani long gredim ol rot na putim kolta. RAMSI i putim mani na ol asples kampani yet i wokim ol dispela rot na tu, ol bris.

Wantaim RAMSI, gavman i wok long kolektim ol takis long ol kampani na ol bisnis insait long kantri. Pastaim, i no gat dispela kain wok bilong kisim mani long takis i stap. O, ol i kisim tasol ol i no kisim gut na planti dinau bilong i stap yet na ol lain manmeri i no peim takis na ronim bisnis.

## **RAMSI i strongim long sait bilong Jastis sistem insait long kantri tu.**

RAMSI i stap na givim planti ol tingting na sapot long sait bilong kot tu. Olsem na kot long dispela taim nau yet i ron gut tru. I gat ol loiya na saveman na meri insait long ol Pasifik kantri i go na stap long lukim olsem dispela kot sistem bilong ol i mas ron gut.

Na i noken sampela paul na les pasin bilong gavman o politik long bagarapim Jastis sistem insait long kantri.

Sampela wok bilong kamapim gutpela gavman o ol i kolim long gut gavanens (good governance) tu i wok long go strong yet.

Long sait bilong lo, ol i lukluk gen insait long lo buk na traim senisim ol lo. Ol dispela lo we nau ol i yusim em long taim bilong bipo long waitman, husat i bin lukautim ol.

Na planti bilong ol dispela lo i no go gut wantaim kantri nau. Ol lo bilong bipo em long taim i no gat planti manmeri na tu, lo we sut long mak bilong ol dispela waitman yet.

Tasol nau wantaim planti senis i kamap insait long kantri, lo mas sut long mak bilong olgeta manmeri, husat i stap long ples na tu, ol lain husat i wok na stap long taun. Em mas lukluk long ekonomi na tu long rijen na wol tu.

Planti ol manmeri long ples i tok planti ol samting i senis na lo na ol narapela mas senis long luksave long ol insait long kantri



**PEREID:** Olpela RAMSI Polis Komanda Will Jamieson i wokabaut long wanpela pereid we i kamap long Rove Polis Ekedemi. Lo na oda em wanpela bikpela wok we ol RAMSI i sanap na daunim.

bilong ol tu.

Narapela eria we ol i bin stretim em long kastoms. Dispela hap bilong sekim ol kago i kam insait long kantri, long strongim wok bilong ol long pulim moa mani i go insait long kantri bilong ol.

Inlen Revenu Divisen (Inland Revenue Division) bilong Solomon Ailans tu i bin kisim sampela luksave long RAMSI.

Dispela divisen we i save kisim takis mani bilong kantri i kisim sapot long RAMSI long narapela 5-yia long wok bilong ol. Nu Silan gavman bai helpim ol aninit long wok bilong RAMSI inap 2013.

Nu Silan gavman bai putim mani olsem NZD \$13.5milien long strongim wok bilong dispela takis divisen, kamapim strongpela takis divisen na gutpela lidasip long ol wokman meri insait long kantri.

Dispela em bihain long gutpela wok bilong Inlen Revenu Divisen bihain we ol i mekim bikpela senis long 2002 i go inap long 2007.

Ol i bin kisim SBD \$582milien long 2002 tasol dispela i surik i go antap long SBD \$1,090 long 2007.

Na long las yia tasol (2008), dispela i go antap long 40 pesen, we i kamapim planti mani long gavman long spendim long ol gavman projek insait long kantri.

RAMSI i helpim Solomon Ailan insait long sait bilong spots tu.

Planti ol advaisa bilong ol i save helpim ol klub bilong soka, ragbi, netbol, basketbol, golf, atletik na AFL long ol fri taim bilong ol.

Tasol ol Solomon Ailan i save laikim tumas soka. Olsem na long dispela yia tasol, ol i helpim Solomon Ailan Futbol Federesen o SIFF (Solomon Islands Football Federation) na kamapim wanpela buk ol i kolim olsem Goal Keepers guide.

Dispela buk i gat laip stori bilong soka taim dispela pilai i kamap namba wan taim long Solomon Ailan long 1954 na namba wan taim ol i kamapim nesanel tim long 1963.

Em i gat stori tu bilong namba wan taim dispela nesinol tim i go pilai long Adelaide long Australia na dro wantaim Australia 2-2 na taim ol i kam bek long ples, Solomon Ailan i amamasim ol long ples balus.

RAMSI tu i mekim olsem ol manmeri ino ken kamap les manmeri long kantri bilong ol yet. Em i laik mekim olsem ol yet i mas kamap papa na mama bilong kantri bilong ol yet long muvum dispela kantri i go het.

Bikpela samting RAMSI save em i olsem ol i no inap stap olgeta wantaim dispela wok bilong ol, nogat. Ol bai lusim klostu taim na ol i laikim olsem ol yet mas i go pas long olgeta samting. Na dispela em ol i kolim olsem kapisiti developmen o strongim savemak.

Prais bilong ol kaikai long stoa i go antap tumas na i dia tumas na ol gavman sevis i no go long ol ples. Em ol sampela samting we gavman mas lukluk taim RAMSI i stap yet.

RAMSI i gat gutpela wok patnasip long kamapim Solomon Ailan olsem wanpela gutpela kantri, we i fri long lo na oda na planti ol gavman sevis i go long ol hauslain na ples na tu bringim bek ekonomi i go bek. Dispela

em wanpela as tingting tu bilong RAMSI i mekim bikpela wok.

RAMSI wantaim Gavman bilong Solomon Ailan tu i mekim sampela kain wok painim aut o stadi long lukluk long ol graun bilong Solomon Ailan long au bes ol i ken helpim ol manmeri long planim ol kaikai bilong ples olsem kaukau, yam, taro na salim long ol maket bilong ples na tu, salim long ol kantri autsait.

Dispela bai kamapim sampela liklik wan siling bilong ol liklik lain long ples, long tingim ol pikinini wantaim skul fi na ol narapela liklik samting olsem.

RAMSI i wok strong wantaim Gavman bilong Solomon Ailan long painim sampela rot long mekim ol liklik fama long ples i ken kisim sampela kain dinau long kamapim sampela liklik ol projek long ples bilong ol olsem lukautim kakaruk, pik, pato o kamapim sampela liklik tred stoa long tingim ol yet long bihain taim, taim RAMSI i go pinis.

Sampela ol si bris insait long kantri i bin kisim sampela luksave pinis. Dispela ol si bris em ol i wokim i go bikpela na stretim long em i ken kisim ol bikpela bot i go insait na opim rot bilong ol manmeri long yusim ol sip olsem transpot bilong ol long i go i kam long ples na taun.

Bikpela tingting RAMSI em i olsem ol asples yet i mas kamap papa na mama long ol dispela wok. RAMSI i laik lukim olsem ol manmeri yet bilong Solomon Ailan i mas mekim wok stap na ol i laik lusim ol.

Long projek plen na moni plen bilong ol, RAMSI i laik pinis long 2013. tasol dispela bai wet long wok bilong ol asples yet.

Sapota RAMSI i lukim olsem ol yet i fit long ranim kantri, em bai ol lusim. Tasol sapota ol i lukim olsem ol i no kisim ol save we ol i givim, em bai kisim sampela taim liklik.

Kantri Solomon Ailan i ken kisim planti save na eksperiens long RAMSI wantaim ol lain bilong em. Ol i lusim planti mani na save bilong wok. Na i no gutpela sapos ol i go aut nating. Ol i lukim olsem ol dispela samting ol i kamapim na mekim em i mas karim kaikai na lukim olsem dispela ol hatwok bilong ol i no lus nating.

Solomon Ailan mas kirap na lainim long ol dispela olupela pasin bilong ol na mekim o lukautim kantri i go het.

**God, Blesim Solomon Ailans.**

*Dispela Hap namba et i pinisim stori bilong RAMSI. Mi tok tenkyu long olgeta rida long stap wantaim mi long wok bilong RAMSI long Solomon Ailan, long wanem, mi bin go na wok wantaim RAMSI long 4-pela yias olgeta na mi save long bekgraun bilong dispela wok bilong RAMSI.*

# Faiv yia plen i mas stap bipo long RESI mani go aut - Marape



**PASIN KASTOM EM OL YA!**  
TUPELA Gret 3 sumatin mangi na meri i soim Siwai pasin kastom long ol klos samting ol i putim. Dispela em long resis bilong Mista na Mis Tredisenel. Monoitu Praimeri skul long Siwai, Sautwes Bogenvil i bin kamapim dispela resis i no long taim i go pinis. Monoitu Praimeri skul i gat moa long 300 sumatin stat long Gret 3 inap long Gret 8. Skul i save strongim pasin kastom na long wankain taim tu, lukim, skelim pastaim bipo ol i kisim ol nupela samting i kam long ausait. *Poto na Stori: Veronica Hatutasi*

Eric Sinebare i raitim



Hon. James Marape

OLGETA edukesen sekta long wanwan provins i laik kisim mani long Dipatmen bilong Edukesen aninit long Rihabilitesen Edukesen Sevis Impruvmen (RESI), i mas i gat faiv yia developmen plen, pastaim long ol i ken kisim dispela mani we i save helpim wok skul developmen program.

Minista bilong Edukesen na Memba bilong Tari-Pori, James Marape, i mekim dispela tok las wik Sande taim em i givim K2 million i go long Memba bilong Kundiawa Gembogl na Joe Mek Teine long Kundiawa.

Dispela mani i bilong mekim wok bilong edukesen infrastraksa developmen program insait long Kundiawa Gembogl ilektoret.

Mista Marape i tok, i gat bikipela wok bilong stretim na strongim ol wok bilong edukesen long wanwan ples, na i mas i gat senis long sistem bilong ronim ol wok edukesen long

wanwan provins i go long ol distrik.

"Mani i stap long mekim wok, na olgeta lida long edukesen na ol opisa bilong edukesen i mas wokbung long kamapim gutpela plen na i gat gutpela mani plen.

"Dipatmen i stap redi long helpim," em i tok.

Mista Mek Teine i tok bikipela tok amamas long Mista Marape.

Mista Mek Teine i tok em i gat bikipela wok long ilektoret bilong em long stretim na mekim ol wok long planti ol skul long elementari skul i go long hai skul.

Em i tok em bai yusim dispela mani long rot gavman i laikim em long yusim, long strongim ol skul.

## Ol skul i mas helpim ol yet na sanap strong

Eric Sinebare i raitim

OLGETA skul i mas sanap strong long wokim ol wok long kirapim ol skul bilong ol yet. "Noken wetim gavman."

Dispela em toktok bilong prinsipol advaisa bilong divisin bilong Edukesen, Essy Walkaima, long taim Kundiawa Lutheran De Hai Skul long Simbu provins i opim tupela nupela haus tisa na wanpela skul stua las wik Fraide.

Mista Walkaima i tok olsem dispela hai skul i nau stap long mak we ol bod, tisa na het tisa i wokbung na toktok long ol gutpela wok ol inap mekim long strongim skul.

Skul i bin sot long ol haus tisa, tasol dispela gutpela wokbung bilong ol lain long skul i lukim dispela tupela haus tisa i kamap.

Mista Walkaima i strongim skul long wokbung yet, na kirapim ol wok ol yet, noken wetim gavman tasol long helpim ol.

**"READY WHEN YOU ARE" ...**

**Features:**

- CDMA 2000 1x Technology
- 200 phone book memory
- SMS (coming soon)
- Schedule
- Alarm Clock
- Data service/internet connection

**RRP K55**

**access just connect**

**TELIKOM**

Enquire now at your nearest Telikom business office



# Kolera aweanes i go yet

**AWEANES bilong sik Kolera bai go het yet long toksave long pablik long lukautim ol yet long bihain taim. Dispela em wanpela samting we ol atoriti bilong helt i lukluk long en.**

Dokta Theo Likei i mekim dispela toktok bihain long nogat moa dai long sik kolera wantaim disentri na influenza. Dispela tu i soim olsem dispela sik i wok go daun.

Provinsel Helt Opisa Dokta Likei, i tok long ol de i go pinis, i nogat ripot bilong dai long Wasu, we kolera i stat, na long Menyamya we disentri na influenza i kamap. Dispela i soim olsem dispela sik i go daun.

Taim em i siarim wanpela miting bilong provin-sel tas fos bilong dispela ol sik, em i tok i gat sampela ol kes bilong dispela ol sik tasol i no olsem long pes taim dispela sik i kamap. Ol dispela i kamap tasol ol i daunim hariap tru. Namba bilong ol sikman meri husait i stap long dispela kea senta long ANGAU haus sik i go

daun tu. Em i tok rot nau i sanap long ol i mas wokim planti aweanes tru na lukautim ol wara saplai, we sik i save ron hariap tru. Tasol long mekim wok aweanes, ol i sot long ol manmeri long autim tok bilong ol dispela sik.

Dokta Likei i tok ol wanwan memba bilong dispela task fos i gat wanwan wok long mekim long kamap wantaim sampela eksen plen long au bai ol i mekim wok aweanes bilong dispela sik.

Big bos bilong Angau haus sik Dokta Polapoi Chalau, i tok namba bilong ol manmeri wantaim ol dispela sik i go daun pinis.

Insait long wanpela wik i go pinis, ol i bin sekim sik bilong 26 manmeri tasol. Long dispela, wanpela tasol em ol i admitim em long ke senta. Ol i no admitim sampela long wod. Nau yet, 98 sikman meri i stap long kea senta.

Long kolera yet, 279 man meri em o i tritim ol na insait long dispela, 20 i dai na long disentri, ol i bin

givim tritmen long 1, 155 tasol narapela 40 i dai. Na long disentri, ol i bin lukluk long 4, 745 tasol 60 i dai. Long bungim wantaim, 120 manmeri i dai long ol dispela sik olgeta.

Long wankain nius, wanpela liklik ami balus bilong Papua Niugini Difens Fos (PNGDF) i painim birua long Menyamya taim em i wok karim ol helt saplai i go. Nogat wanpela man o meri insait long balus i kisim bagarap.

Dispela liklik balus i go kamap long ples balus na em i pundaun pinis tasol bihain em i kalap i go kam na fran wil bilong dispela liklik balus i kam aut na nus bilong balus igo pas long gras.

Ol lain otoriti husait igo pas bai lukluk long au dispela birua i kamap.

Long narapela wankain nius, Lae polis stesin i pas long wik i kam long wanem, i gat tok olsem Lae polis sel tu i gat bikpela kolera i kamap. Na ol kalabus manmeri wantaim ol polis i pret nogut tru long wiken.

Stori bilong dispela sik i go bikpela na polis i no moa kisim ol nupela kalabus man o mekim ares bilong nupela lain. Ol bai traim long stretim dispela ples pastaim na rausim olgeta kalabus bipo ol i kisim ol nupela kalabus manmeri.

Bos bilong Lae siti polis Nema Mondiai i tok long wiken, ol i kisim wanpela ripot olsem wanpela bilong ol dispela kalabus bilong ol kolera na ol i kisim em i go long haus sik tasol bihain ol i painim olsem em i gat malaria na ol i stretim em wantaim marasin bilong malaria.

Ol i holim wanpela miting bihain long dispela hevi na singautim ol lain long haus sik i kam sekim sel na spreim wantaim ol marasin bilong kolera.

Mondiai i tok ol i rausim ol kalabus husat i gat ol liklik trabel na tu, bai bringim ol narapela hariap i go long kot na sapos ol i adjenim kes bilong ol, em bai ol i kisim ol i go putim i stap long Buimo haus kalabus pastaim na wetim kot.

## Asosiesen laikim bosman i mas dokta

**Paul Zuvani i raitim**

"MIPELA laikim wanpela dokta long kamap sif eksekutiv opisa (CEO) bilong Pot Mosbi Jeneral Haus sik.

I no wanpela man nating," Nesenel Dokta Asosiesen (NDA) i tok.

Presiden bilong Asosiesen, Dokta Kauve Pomat i tok dokta husat i holim wok sif ekekyutiv opisa i save moa long wanem samting haus sik bai nidim, moa wanpela man nating.

Long dispela as em i gutpela long wanpela dokta stret i kamap sif eksekutiv opisa bilong Pot Mosbi Jeneral Haus sik.

Dokta Pomat i mekim dispela tok tok taim Pot Mosbi Bod bilong Dairekta i makim Sem Vegogo long kamap nupela eksekutiv opisa bihain long pinis bilong olpela CEO Dokta Alphonse Tay.



**MAKIM RAITMAN:** Pomat laikim wanpela dokta stret long kamap bosman bilong Pot Mosbi Jeneral. *Poto: PAUL ZUVANI*

Vegogo bilong haus sik olsem Noten Provins, i Mosbi Jenerel Haus sik.

"Long ronim kain haus sik olsem Mosbi Jeneral Haus sik yu mas wanpela dokta. Yu mas save long wanem marasin yu laikim na kisim stret. I no wetim ol narapela long tokim yu long wanem samting yu mas mekim.

"Hia mipela i mekim wok bilong sevim laip na em i bikpela samting," Dokta Pomat i tok.

## NATIONAL HEART FOUNDATION OF PAPUA NEW GUINEA INC.

# Wol Hat De - Septemba 27, 2009



**P**lantil ol bisnis i luksave long gutpela bilong helt bilong ol wokman men long bringim kamap gutpela wok insait long bisnis na ol i redim ol helt promosin insait long koporet wok ples bilong ol. Tasol plantil taim e mol bikpela koporesins husait i save givim ol wokples helt program. Insait long ol liklik bisnis na ol lain husat i save wok long ol yet, ol dispela lain i mas redim ol yet tu.

### Olsem wanem yu ken bihainim rot long kamapim gutpela helti ples bilong wok....

- Yu mas stap fit olgeta taim long wok ples. Kamapim wanpela ek-sesais o pilai spot wantaim ol wan wok na tu tokim ol wanwok bilong yu.
- Wokabaut raun insait long wok-ples bilong yu o mekim oksesais long belo taim. Putim ol psikol oksesais long wok ples bilong en na toksave long ol narapela tu long mekim wankain.
- Givim ol wan wok bilong yu ol infomesin long gutpela ol i ken kisim taim ol kisim trening o eksesais olgeta taim.
- Helpim ol narapela husat i laik stap strong na yu mas mekim eksesais pastaim.
- Tok strong olsem noken simuk long ples bilong wok.
- Tok strong long helti fus long wok kentin bilong yu, o painim wanpela gutpela kalkan ples o restauran husat i save givim ol helti kalkan.
- Toktok wantaim ol human risos o lain menesa bilong yu long rot long kirapim wanpela helti wok-ples polisi.



**Nau em stap long han bilong yu yet long daunim ol birua long sik bilong lewa.**

### WOL HAT FEDERESIN

Infomesin long Wol Hat Federesin  
Wol Hat Federesin i amamas long helpim ol pipel i stap longpela na gutpela laip na lno ken kisim sik long hat na kontrolim hat na strok, wantaim luksave ong ol lain long ol kantri we pei bilong ol i daunblo i narrel tasol. 195-pela kantri i memba sosaiti bilong kardioloji na hat faundesin i kam long moa long 100 kiantri i stap insait long ol njon long Afrika, Amerika, Asia-Pasifik na Yurop.

### Infomesin long Wol Hat De

*Wol Hat De* i bin kamap long toksave long ol pipel insait long wol olsem sik bilong hat na strok am ol bikpela long wol na i go mas long planti lain indai, na i save kilim indai 17,2 miliar laip insait long wan wan yis. *Wol Hat Federesin* wantaim ol memba bilong en i putimaut ol nius olsem samting olsem 80% ol lain husat i save dai yangpela long sik bilong hat na strok em i ken stop sugos ol lain lno simuk tobaka, na ol pipel i kalkan ol rabis kalkan na kontrolim ol eksesais bilong ol

*Wol Hat De* bai kamap long Sanda, 27 Septemba 2009 long kirapim tingting bilong yu long "Wok wantaim Hat. Ol ektiviti ol lain memba na patnas bilong Wol Hat Federesin bai lukim ol lain i ron, pablik toktok, konsel, ol pilai na sampela moa. Tokim mipela long ol ol helt wok ples bilong yu long [www.world-heartday.org](http://www.world-heartday.org)

# Ol Simbu Luteran tingim ol Finsafen Luteran

Eric Sinebare i raitim

**STRONG na hatwok bilong ol Kotec Finsafen lain i bringim tok bilong God i go long hailans olsem long Simbu provins. Tok bilong God i karim kaikai na nau mipela i stap na i gat planti save na blesing.**

Presiden bilong Papua

Niugini (PNG) Lo Sosaiti, Kerenga Kua, i mekim dispela toktok las wik Sarere long Ega, Kundiawa, long Simbu. Em i mekim dispela toktok long taim Evanjalikel Luteran Sios bilong PNG (ELC/PNG) Simbu distrik, i amamasim namba 75 yia bihain long ol lain Morobe i bringim tok bilong God i go long Simbu.

"Mipela i tok tenkyu long God na long ol manmeri i kam long Finsafen long long bringim tok bilong God long mipela," Mista Kua i tok.

Em i givim mani mak olsem K20 tausen olsem tok tenkyu long ol manmeri long Morobe husat i kam long Simbu na lainim ol long tok bilong God.

Mista Kua i tok ol i no inap

tok tenkyu inap, olsem na dispela mani i makim maus bilong ol Luteran bilong Simbu, na ol i givim long wokim nupela o kirapim dispela memorial haus lotu long Simbang, namba wan ples we tok bilong God i kam stap.

"Wokim nupela haus lotu na wokim bikpela na strongpela. Em i mas i gat luksave," em i tok.

## Namba mi kisim em bilong sios na pipel bilong Bogenvil

Veronica Hatutasi i raitim

"AWOD o namba mi kisim em bilong sios long Bogenvil na olgeta rilijes, sios wok manmeri na pipel bilong Bogenvil," Bisop Henk Kronenberg, Bisop bilong samting olsem 145,000 Katolik pipel long Bogenvil, i tok.

Em i wokim dispela toktok taim em i stori wantaim Wantok Niuspepa bihain long em i kisim top luksave awod o namba long Logohu Awod bilong selebretim 2009 Indipendens bilong PNG.

Namel long 109 manmeri husat i bin kisim namba, Bisop Henk i bin kisim top luksave long bikpela wok em, i mekim bilong sios na pipel bilong Bogenvil taim em i kisim taitel, "Sif".

"Dispela namba mi kisim em bilong tingim ol misinari na ol Katekis husat i bin wok pas-taim long Bogenvil bikos hatwok ol i mekim i planim kaikai we nau i strongim wok bilong sios long Bogenvil. Mi kisim



TINGIM PIPEL: Bisop Henk Kronenberg.

long makim olgeta," Bisop Henk i tok.

Mak bilong ol Katolik pipel long Bogenvil em inap long samting olsem 145,000. Mak bilong olgeta pipel long Bogenvil i samting olsem 200,000.

Narapela em long Seven De Ewentis, Yunaitet na ol liklik Pentekostel Sios i go insait long ailan bihain long Bogenvil hevi.

Bogenvil i gat 32 Katolik peris na 18 pater i lukautim. Bipo long hevi, wan wan peris

i gat pater, tasol long dispela taim, i nogat.

Bisop Henk i tok sios na bilop bilong ol manmeri long Bogenvil i go strong yet. Na bikpela samting we i strongim dispela em long Besik Kristen Komyuniti (BCC) na Liklik Kristen Komyuniti (LKK).

"Long taim bilong Bogenvil hevi, ol LKK na BCC i bin wok strong tru na holim ol komyuniti long preia, wok marimari na gutpela pasin. Ol sios wok manmeri na ol Katekis i mekim gutpela wok tru. Ol i wok hat olsem ol voluntia na ol i no kisim pe long wok ol i mekim.

Mi ting dispela i mekim wok bilong sios i ron strong long ol komyuniti na pipel bilong Bogenvil," Bisop i tok.

Bisop Henk i bilong kantri Holan o Nedalens long Yurop. Em i bilong ples ol i kolim long Enschede, klostu long bodamak wantaim Jemani. I no long taim bihain long em i kamap pater, em i bin kam olsem wanpela misinari long PNG na Bogenvil long yia

1965. Nau em i 44 krismas Bisop Henk i stap na wok long Bogenvil. Namba wan peris em i bin wok long en em long Hantoa long Buka. Bihain em i wok olsem peris pris long Turiboiru, Piano na Tokaino long Buin. Na long Asitavi, Panguna na Tunuru bipo em go insait long Katekis skul Ministri long Mabiri. Long 1991, em i bin skul tisa long Bomana.

Long 1995-99, em i bin holim wok olsem Jenerel Sekreteri bilong Katolik Bisops Konprens bilong PNG na Solomon Ailan. Long 1999, em i bin kamap bisop bilong Bogenvil i kam inap nau. Long dispela mun, krimas bilong em inap long 75 yia na long Katolik Sios, dispela em i mak bilong malolo o ritaia. Em i givim pinis pas bilong em i go long hetman bilong Katolik Sios long wol, Pop Benedict 16 long givim tok orait. Em bai wok yet olsem bisop bilong Bogenvil inap ol i makim nupela bisop long kisim ples bilong em.

## Paul Bina kamap SVD pater

Pater Paul Liwun SVD i raitim

Long Sarere, Septemba 19, 2009, insait long YC Hall bilong Katolik Sios long Goroka, Isten Hailans provins, wanpela bikpela selebresen i kamap.

Wanpela yangpela man, nem bilong em Paul Bina, i bin kisim Sakramen bilong Ordo long kamap insait long Katolik Sios. Em i wanpela pater bilong lain Divain Wod Misinari (SVD).

Bisop Francesco Sarego SVD, bilong Goroka Katolik Daiosis, i bin go pas long lotu na givim Sakramen bilong Ordo i go long Paul. I gat narapela tupela bisop tu i stap wantaim, bisop Anton Bal bilong Kundiawa Daiosis na bisop Arnold Orowae bilong Daiosis bilong Wabag.

I gat 58 pater bilong kain kain lain, wantaim planti rilijes bruder na sista, husat i bung wantaim ol manmeri bilong Goroka long lukim na amamasim dispela Lotu bilong Odinesen.

Long skul bilong em, bisop

Francesco i askim olgeta manmeri long pre long helpim dispela yangpela man nau i kamap pater, na long helpim ol narapela pater nau i stap wokim wok bilong ol. Dispela yia 2009, em i spesol yia bilong ol pris.

Papamama bilong Paul i bilong Simbu provins. Tasol longpela taim i go pinis ol i stap long Kamaliki na wok long wanpela plentesen. Olsem na bihain long odinesen bilong Paul, em i bai go raun long wokim lotu misa long asples bilong em na narapela komyuniti. Bihain long wanpela mun, em i bai go mekim wok pater long Timbunke peris, long Wewak Daiosis.

Sapos ol i stretim paspot na visa bilong em, Bina bai i go na mekim wok bilong pater olsem wanpela misinari long kantri Ajentina (Argentina).

Olsem na bisop Francesco i tokim ol manmeri, "Taim Paul i lusim yumi (PNG) na go mekim wok long Ajentina, em i no go long em yet. Em i go wantaim yumi. Em i go wantaim PNG. Em i bringim PNG.



KISIM SAKRAMEN: Bisop Francesco i wokim prea bilong blesim Paul Bina, bihain long givim Sakramen bilong Ordo long en. (Photo P. Phil Gibbs SVD)

Em i bringim yumi olgeta. Wanem samting em i wokim long Ajentina, em i wokim long nem bilong yumi olgeta."

Bisop Francesco i tokim Paul, "Taim yu stap long hap, noken lusim tingting olsem mipela i stap wantaim yu. Mipela i wok wantaim yu. Olsem na yu i mas stori long mipela wanem samting yu wokim long hap, bai mipela i save na amamas wantaim yu."

Nau i gat 14 SVD pater bilong PNG. Namel long ol 10-pela i mekim wok misinari long ol narapela kantri. Foapela tasol i mekim wok long PNG.

Long taim bilong odinesen, bisop Francesco i askim ol manmeri, "Husat bai bihainim Paul? Bihain long Paul, husat namel long ol yangpela manmeri i laik mekim wok wankain olsem pater or bruder o sista?"



## Namba 34 Indipendens Selebresen

LAS WIK ol manmeri bilong Papua Niugini i amamas tru long soim kain kain we bilong selebretim independens bilong kantri bilong yumi.

Igat spot, kalsa so, singsing tumbuna, Hiri Moale Kwin resis na narapela moa, long soim kala tru bilong kantri bilong yumi.

Ol manmeri i stap long Pot Mosbi i taitim bun tru long wokim selebresen i kamap naispela long wan wan skul na wan wan komyuniti o grup.

Sevenpela yia i go pinis mipela long St. Peter Chanel Peris long Erima i save selebretim independens long peris yet. Mipela i statim wantaim santu misa. Wan wan komyuniti i kisim hap bilong lotu olsem prosesio na danis wantaim. Em i bin kamap naispela tru bikos mipela statim soim kala bilong yumi insait long haus Lotu wantaim God. Mipela i no lusim tingting long em.

Bihain long misa, mipela i bung long fran bilong haus lotu na wokim flek resing. Manmeri i amamas tru long singsing nesenel antem na narapela ol nesenel singsing bilong yumi stret. Selebresen i no save pinis long flek resing tasol. Nogat. Mipela i bung insait long peris hol gen na selebretim wantaim yet. I gat kain kain singsing tumbuna i kamap long wan wan rijen na komyuniti. Long dispela yia mipela i gat resis bilong mis tredisenel.

Etpela komyuniti insait long Erima peris i redim singsing tumbuna na bringim ol meri i makim ol i kamap antap long step. Em i bin wokim stori long ol bilas tumbuna em i werim na bihain em i mekim tok-tok long mining bilong independens.

Igat sikspela tasol i kamap na wokim dispela tok-tok, na Mis Michaelin George, wanpela gret faiv sumatin bilong St. Peter Chanel Paimari skul i bin winim na kamap namba wan mis tredisenel bilong St Peter Chanel parish Erima. Em i bin werim tumbuna klos bilong Tanga insait long Wes Nu Briten Provins. Em i liklik meri yet, tasol em i wokim naispela toktok long mining bilong independens. Olsem na em i winim trofi bilong peris. Olgeta konsistenten i bin kisim prais long peris kaunsel i givim.

34 yia yumi stap independen o sanap yumi yet. Tasol planti i no stap independen tru. Indipenden i min yumi i no stap hangamap long ol arapela manmeri moa. Yumi sanap antap long lek bilong yumi na mekim wok. I luk olsem sampela bilong yumi i bagarapim dispela tok independens. Bikos yumi bihainim laik bilong yumi wan wan. Sapos yumi stap long dispela pasin, gutpela taim bai no inap kamap long yumi. Indipendens i min yumi stap fri tasol i gat lo na oda bilong kantri long helpim yumi. Lo na oda i no save bagarapim yumi. Yumi tasol i bagarapim lo na oda, bikos yumi laik bihainim laik bilong yumi wan wan.

Long dispela 34 yia yumi wan wan i gat wok bilong yumi yet long wokim kamapim kantri bilong yumi. Long developim kantri em i no wok bilong gavman, o wok bilong ministra na ol memba tasol. Noken lusim tingting olsem olgeta de, sapos yumi mekim wanpela gutpela wok, em i soim olsem yumi developim kantri bilong yumi. Tasol sapos yumi wokim wanpela samting nogut, em i mak bilong yumi bagarapim kantri bilong yumi.

I no olgeta manmeri insait long kantri i pilim olsem yumi independens. Planti manmeri bilong ples i nogat planti senis i kamap long ol. I nogat gutpela edukesen olsem na planti samting nogut i save bagarapim sindaun bilong ol.

Sik Koler i bin kamap na kilim planti manmeri bilong Morobe, i soim olsem manmeri bilong ples i no sindaun gut. Ol i nogat gutpela save bilong lukautim ol yet. I soim olsem planti manmeri bilong kantri bilong yumi i sot long save bilong lukautim yumi yet. I no manmeri bilong Morobe tasol. Insait long bikpela siti Pot Mosbi, i gat planti manmeri i no save lukautim ol yet long helt na ol arapela samting.

Tingim! Divilopim kantri em i wok bilong yumi olgeta!

# Hatwok bilong Elizabeth i karim kaikai



**HATWOK I KARIM KAIKAI:** Elizabeth Parum i amamas long lukim hatwok bilong em i karim kaikai. Em i stretim ol samting long nupela kes na keru han stua bilong em, Naiaga, long Arawa.

**Veronica Hatutasi i raitim**

**PLANTI ol bisnis long Bogenvil tude i bin kirap na wok gut bikos long gutpela lukaut bilong ol meri.**

Wanpela em long Naiaga Treding.

Het opis bilong dispela stua bisnis i stap long Buka, tasol em i gat ol han stua long Buka ol kokopau na Arawa.

Bisnis i ron gut na em i gat 83 wok manmeri long ol dispela tripela ples. Stua bisnis i gat riteil, holsel, weahaus na kes na keru long ol samting ol i pekim long 6 pek na salim.

Meri Wantok i bin stori wantaim mama tru bilong stua, Elizabeth

Parum, long rot we dispela bisnis i kirap na nau em i groa bikpela.

"Mi bin stat wantaim K1,000 long baim na salim ol 6 pek kaikai long haus bilong mipela long Kokopau, Buka. Bihain, mi rentim wanpela liklik rum na tingting strong long salim ol samting long em. Em i no bin isi. Mi bin joinim ol Meri long Bisnis grup long Bogenvil na stap insait long ol bung na woksop, tasol mi no lukim o kisim gutpela sapot long sait bilong ranim bisnis. Olsem na mi tok mi wan yet i mas stat salim ol samting.

" Mi stat wantaim ol klos, ol kaikai olsem rais, tinpis, tinmit, biskit na nudels samting. Olsem wanpela meri i

gat laik long statim liklik stua bisnis bilong mi, mi bin painimaut olsem Bogenvil Wimens Bisnis Asosiesen inap rejistaim o helpim mi. Long dispela taim, AusAID i bin gat mani long helpim ol meri tasol mi no kisim wanpela gutpela sapot. Tasol mi no bin givap. Em i bin hat tru bikos nogat man i laik givim helpim long samting mi laik wokim. Tasol long strong bilong mi yet, wok long stua i go het na i groa long liklik samting mi statim long haus i go long liklik spes mi rentim na nau, mipela i gat holsel, riteil, weahaus long Buka, Hutjena, Kokopau na Arawa.

"Long las mun tasol,

ol i bin opim kes na keru stua long Arawa we ol manmeri i ken kisim ol samting mipela i pekim long 6 na 12 pek. Mipela i givim 25-30 pesen diskaun o prais i go daun na dispela i mekim ol man i amamas. Moa yet, ol kastoma bilong Sentral Bogenvil, Bana, Siwai na Buin, ol i amamas tru bikos Arawa olsem

hafwe ples i sevim ol long trenspot fi na tu, katim wokabout i go sot liklik," Elizabeth i tok.

Em i tok long dispela mun, ol bai kisim ol frisa o bokis ais kago na stat long salim long ol stua bilong ol.

Elizabeth i tok em na lain bilong em i save odaim ol klos na ol narapela samting i kam

long John Jay na Tropicana long Rabaul. Ol kaikai samting em ol i save kisim i kam long Pelgens, Lae na ol sof dring long Coca Cola.

Nau, Elizabeth i tok bikpela samting bisnis bilong em i mekim em long helpim ol yut, ol meri, na ol disebel pipel i gat sampela kain bagarap long bodi bilong ol.

Nagaia Treding em i meja o bikpela sponsa long Blek Okid Ragbi Yunien sampionsip ol yut long olgeta hap bilong Bogenvil i bin stap long em na pilai resis long Buka las yia Novemba.

Ol bai skruim dispela sapot long dispela gem taim pilai i kamap long dispela yia gen.

## Meri sumatin winim K32,400 wantaim Digicel



**BIKPELA WIN:** Digicel Bosman, John Mangos (lephan) i sanap holim sekmani we Whinonoh (namba foa long lephan i go) na ol poroman bilong em i sanap lukluk.

WANPELA de bihain long namba 34 yia bilong kantri i kisim independens i lukim wanpela yangpela meri sumatin bilong Yunivesiti bilong Papua Niugini (UPNG) i winim K29, 400 taim em i ansarim mobil fon bilong em na tok "All I Need Is My Digicel".

Whinonoh Namora, em i wanpela meri Madang husat i mekim nau namba foa yia bilong em long UPNG. Em i skul kemistri.

Las wik Fonde, bekim bilong em i bin lukim em i winim K29,400, na bihain em i bin gat sans gen long spinim wil we em i bin winim narapela K3, 000 gen.

Whinonoh i bin kisim namba tu sans long winim mani bihain long em i givim bekim "Digicel i save bringim wol i kam long mi na mi no inap wari long lusim domitori bilong mi." Wantaim dispela win

bilong dispela yangpela meri Madang, mak bilong kes prais win bilong dispela promosen bilong Digicel i go inap K74,400.

Bosman bilong Digicel, John Mangos i bin stap long givim sekmani i go long Whinonoh, na em i tok gen olsem ol Digicel mobil fon kastoma i mas larim fon bilong ol i stap on, sapos ol i laik gat sans long winim kain mani olsem Whinonoh i winim.



**FIT MERI:** Leftenen Kylie Storen bilong Australia Difens Fos i sanap amamas wantaim Praivet Nathan Thavara bilong Papua Niugini Difens fos long 17 Mail long NCD. Ol i bin bung long hap long amamasim na makim pinis bilong Eksesais Tuari Taudia, we i bin kam aninit long wanpela difens fos wok bung bilong tupela kantri ol i kolim Eksesais Olgeta Warrior 2009. *Poto: Australia Hai Komisin*

**TOK PISIN NEWS**  
from Radio Australia

Harim TOK PISIN long  
Radio Australia  
**101.9FM**  
Port Moresby

Tok Pisin Service  
6am - 7am 6080; 7240(KHZ)

**Gavman i traim kisim  
sapot long kirapim  
klaimet senis agri-  
men**

AUSTRALIA gavman i wok long traim long mekim planti samting bilong mekim pipel long Australia yet na ol arapela gavman long kamap wantaim wanpela klaimet senis agrimen.

Niusmeri Louise Yaxley i ripot olsem, Australia Klaimet Senis Minista, Penny Wong, i wok long toktok wantaim ol narapela lida long US long kamapim wanpela agrimen em bai larim ol diveloping kantri i rejista o putim nem daun, bilong toksave hau ol bai daunim ol wok i save kamapim ges nogut em i kamapim klaimet senis, na maski long mekim ol promis long putim wanpela mak o target bilong winim.

Australia Greens Pati i tok gavman i mas tokim ol diveloping kantri stret olsem, we bilong ol bilong daunim posin pipia i no strong bikos ol strongpela kantri i daunim pinis mak bai ol i mas winim planti taim pinis.

Tasol niusmeri Louise Yaxley i tok, taim gavman i traim long kamapim wanpela kain wol agrimen, em i wok long traim tu long mekim Australia senet i oraitim loa bilong en, na i wok long mekim poret lain oposisen wantaim toktok long pasim palamen na go long ileksen sapos senet i no oraitim lo bilong en long Novemba.

**Isten Hailans bai  
rausim ol setelmen  
bikos long sik**

OL atoriti long Isten Hailans provins bilong Papua Niugini i tok ol i tingting long muvim auto l pipel i save brukim loan a sindaun long ol setelmen, long wanem bikpela pret i kamap olsem, kain sindaun bilong ol olsem i save kamapim ol kain kain sik em planti i save dai long en.

Moa long 100 pipel i dai long ol sik nogut olsem kolera, influenza na disentri insait long Morobe provins long dispela mun i go pinis.

Isten Hailans Provinsel gavman i tok ol dispela setelmen, we pipel i brukim lo na go sindaun bung long graun bilong narapela, i nogat ol gupela toilet, wara saplai, na ol samting olsem bilong lukim olsem ples i stap klin oltaim.

Administrata bilong Isten Hailans, Munare Uyassi, i tok i gat sampela setelmen klostu long Goroka taun, em ol i ken kamapim bikpela sik, na ol i tingting long rausim ol pipel i save stap long ol.

Ol provinsel atoriti i tambu pinis tu long pipel i noken salim kaikai ol i kukim pinis arere long Hailans Haiwe.

Isten Hailans i toksave olsem provins nau i gat wanpela man i gat dispela sik kolera na i tok, Hailans Haiwe i joinim dispela provins wantaim Morobe we moa long 100 pipel i dai pinis long sik kolera dispela mun.

**Klostu bai ol i sasim  
olpela presiden,  
Gaston Flosse long  
korapsen**



**EM I DAI PINIS:** Indonesia Nesenel Polis Mausman, Meja Jeneral Nanan Sukama, i holim piksa droing bilong wanpela biknem teroris man long Malesia. Nem bilong em Noordin Top. Ol i tokaut long Sarere, olsem ol Indonesia polis i sekim blut bilong em na tok em tasol em Noordin. Ol i bin kilim em i dai long wanpela pait wantaim polis las wik. (AP Poto i kam long AAP Images)

LONG Frens Polinsia, ol i redi long sasim seneta na olpela presiden, Gaston Flosse, bihainim ol wok painim long pasin korapsen.

Ol jas i bin wok long askim gut Mista Flosse bihainim ol tokwin olsem, em i bin paulim samting olsem 2.2 milian US dola long opis bilong post na telekomyunikesen.

Ol i ting polis bai sasim em dispela wik. Ol i holim kalabus pinis foapela pipel, wantaim tu sekreteri bilong Mista Flosse, insait long haus kalabus olsem hap long ol wok painim nau i go het yet.

**Praivet sekta ama-  
mas long gavman sin-  
gautim ol long baset  
toktok**

EKSEKYUTIV Siaman bilong Fiji Employas Federesin i amamas long tingting bilong interim gavman long holim wanpela miting bilong toktok long 2010 baset.

Ol man i makim pablik na praivet sekta, ol yunion na ol memba bilong ol fainensal sevis, i bin stap long dispela miting.

Em i bin larim ol pipel long toktok long hau ekonomi bilong Fiji i ron nau na kamap wantaim sampela tingting bilong strongim ekonomi long groa na kamapim wok bilong ol pipel.

Digby Bosley bilong Employas Federesen, i bin stap long miting na em i tokim Redio Australia Pasifik Bit progrem, olsem i luk olsem interim Praim Minista, Frank Bainamarama i gat laik long wok wantaim praivet sekta bilong draivim ekonomi.

**Tapiok, kaikai bilong  
planti bai bungim hevi**

**long ges nogut**

OL NUPELA wok painim o risets, i soim olsem kasava o tapiok, bai gat moa posin long en na bai noken groa gut tumas, taim kabon daioksait o ges nogut i kamap bikpela antap long ol kilaut.

Wanpela tim bilong Monash Yunivesiti long Melbon, Australia, i bin testim tapiok aninit long ol kain senis long klaimet na ol i painim dispela.

Tim Lida, Dokta Ros Gleadow, i tok bikpela kabon daioksait antap long kilaut i mekim na tapiok i kamapim bikpela posin insait long en.

Samting olsem 750 milian pipel raun long wol i save yusim na stap laip long tapiok olsem namba wan kaikai bilong ol.

Dokta Gleadow i skelim olsem, pastaim long 2050, pipel bai go hangere taim tapiok i karim moa posin, na tu, em bai noken karim planti tapiok tumas taim pipel i planim.

Ol kain tapiok bilong Pasifik i no save karim bikpela posin tumas, na ol i ken go bagarap kwik na i no karim planti tapiok, long taim bilong drai.

**PM Rudd askim  
intanesenel komyuniti  
long go isi long  
Afganistan**

AUSTRALIA Praim Minista Kevin Rudd i tok intanesenel komyuniti i mas skelim gut ol kain toktok ol i mekim long ileksen bilong Afganistan.

Ol i kandim pinis ol fainel vout, tasol bai ol i no nap save husat tru i win inap long sampela wik, taim ol pipel i glasim ol tokwin olsem, gavman i mekim sampela paul wok long vout, o pasin ol i kolim 'vote rigging'

long tok inglis.

Nau yet, ol i tokaut pinis olsem man i presiden bilong kantri nau, Hamid Karzai, i win pinis.

Mista Rudd i tok ol wol lida i mas sapotim husat i win bilong kamapim gupela sindaun long Afganistan.

**Ol i painim narapela  
bot i karim ol asailum  
sika long solwara  
blong Australia**

GAVMAN bilong Australia i painimaut long narapela bot i karim ol asailum sika, klostu long not wes nambis bilong Australia.

Gavman i tok, wanpela balus i bin painimaut long dispela bot long Sarere, long not bilong Coco-Keeling Ailans.

Fifti foa (54) pipel i bin stap antap long dispela bot na nau ol i kisim ol i go pinis long ditensen senta long Krismas (Christmas) Ailan.

Gavman i tok, dispela bot i stap long solwara na pipel antap long en i bin pinis long kaikai na wara bilong dring.

**Bikpela wari long  
pipel i yusim drag  
taim ol i draivim kar**

NUPELA wok painimaut i soim pipel i yusim drag taim ol i draivim kar long Nu Silan (New Zealand), i mas bikpela moa long dispela ol opisa i bin ting long en.

New Zealand Herald, i ripot wanpela sevei ol i bin karimaut long 1200 pipel bilong Nu Silan, i save yusim drag i soim planti i save smukim spak brus bipo ol i draivim kar long ol yia i go pinis na 21 pesen i tok, ol i draiv taim ol i dring ol strongpela dring.

**Moa long pes 14**

**TOK PISIN NEWS**  
from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

Tok Pisin Service  
6am - 7am 6080; 7240(kHz)  
7pm - 9pm 5995; 6020; 9710; 1280(kHz)

**I kam long pes 13**

Niuspepa ripot i tok olsem Trensport Minista bilong Nu Silan, i autim toktok bihainim sevei bilong Drag Faundesen, na i tok, dispela hevi i mas bikpela moa long ol i bin ting long en. Polis nau i redi bilong strongim nupela drag draiving tes stat long mun Desemba.

**Terorisim inap kamap yet long Indonesia**

FOREN Afes Minista bilong Australia, Stephen Smith, i tok pasin terorisim inap kamap yet long Indonesia, maski ol i kilim dai pinis, Noordin Mohammed Top. Polis long Indonesia i bin kilim dispela lida bilong ol teroris insait long wanpela pait long gan long Sentral Java long Fonde las wik. Mista Smith i bin tokim Channel Nine nius, olsem pipel bilong Australia i lukluk raun long Indonesia, i mas lukaut gut long raun bilong ol long dispela kantri.

**Ripot long pudaun bagarap bilong balus bai redi long sikspela mun**

OL LAIN i wok glasim birua bilong wanpela balus long Kokoda i tok laspela ripot long birua bai redi insait long sikspela mun. Ol atoriti long Papua Niugini i putim aut pinis wanpela interim ripot i autim wanem ol samting i bin kamap long dispela pudaun bagarap bilong balus, em i bin kilim 13 pipel wantaim tu nainpela bilong Australia. Tasol dispela ripot i no tokaut klia long wanem samting i bin mekim balus i pudaun, tasol Sivil Eviesen Minista, Charles Abel i tok, bihain long ol famili bilong pipel i bin dai i painimaut bai ol i painimaut tru tru long wanem ol samting i bin kamap.



**HARIM MUSIK BILONG GUTPELA SINDAUN:** Ol lain manmeri bilong kantri Cuba i paspas long wanpela musik konsert ol i kolim "Peace Without Borders" long Havana long Sande. Olgeta i go bung long Revolution Square long lukim biknem musik man bilong Colombia, Juanes i pilai. (AP Poto i kam long AAP Images)



**BATRI FLET:** Wanpela liklik pikinini i silip long karis bilong em long bikpela festival bilong bia i save kamap olgeta yia long Sauten Jemani. Nem bilong dispela festival em Oktoberfest, na em i wanpela festival bilong bia tasol. Em i save kirap long Sande Septemba 20, na ron i go inap Oktoba 4. (AP Poto i kam long AAP Images)

**Australia ba asosiesen i wari long Fiji rul ov lo**

PRESIDEN bilong Australia Ba Asosiesen, Tom Bathurst, i tok 'rul ov lo' i wok long bungim bikpela hevi long Fiji bikos gavman i no save luksave long ol

tingting o ruling bilong kot. Gavman bilong Frank Bainimarama em i kontrolim kantri bihain long ku, i no long taim i go pinis, i bin givim wanpela setifiket bilong rausim wanpela tingting bilong Kot ov Apil em i bin tok, dispela Bainimarama gavman i brukim loa. Mista Bathurst i tok sapos

kantri i nogat indipenden judisari o ol jas i wok bihainim lo stret na gavman i no suvim tingting tasol long en, Fiji i ken lus tingting olgeta long mining bilong 'rul ov lo', na dispela i ken mekim gavman i go het tasol na bagarapim rait bilong pipel.

**Ekonomi bilong sam-pela ailan kantri bai kamap orait**

ESIAN Developmen Benk i senisim na putim mak i ting ekonomi bilong sampela Pasifik kantri bai i go antap long en long 2009. Tasol em i tok lukaut olsem sapos rijen i laik kisim sans long ekonomi nau i wok long kamap gut raun long wol, em i go het wantaim rifom. Nupela Esian Developmen Autluk Apdet, ol i bin rilisim i senisim mak bilong groa, Benk i bin ting ekonomi bai go antap long 2009 long Vanuatu, i go antap long 4% na bilong Papua Niugini bai go antap liklik long 4.5%. Kuk Ailans, Fiji, Palau, Samoa na Tonga, ol i ting bai liklik tasol bilong Solomon Ailans, ol i no ting bai go antap.

Ekonomis saveman bilong Esian Developmen Benk long Pasifik, Craig Sugden i tok, gutpela ron bilong Vanuatu i wanpela piksa long ol narapela ekonomi.

**Ol atoriti i traime yet long kisim aut 12 pipel i stap pas ol ais**

OL atoriti long Noten Marianas i wok hat yet long kisim aut 12-pela manmeri i pas long ol longwe ailan, bihainim kamap bilong Taifun Choi Wan long wik i go pinis. Imejensi Menesmen Opis i tok, ol i bin halivim sikspela bilong wanpela famili long Alamgan long wik i go pinis, tasol etpela arapela pipel i stap yet long halivim bilong ol. Fopela moa pipel i stap long Agrihan em i stap klostu, em Taifun i bin bagarapim tu. Mausman bilong Opis, Juan Camacho, i tok ol i kisim pinis ol halivim bilong kaikai em inap halivim ol inap faivpela de tasol, bai ol inap long pinis tu long wara bilong dring insait long tupela de.

**UN Dvelopmen program bai halivim kantri wantaim**

**envaironmen**  
YUNAITET Nesens Dvelopmen Program i sainim pinis agrimen wantaim gavman bilong Kiribati bilong halivim em wantaim ol envaironmen program. Em i bihainim ol askim long ol kantri save halivim bilong lukim olsem mani ol i givim bilong karimaut ol klaimet senis program, ol i yusim gut. UNDP bai lusim samting olsem 95 tausen US dola bilong halivim ol opisal long Kiribati bilong strongim wok buk kiping bilong ol na wok bilong karimaut program. UNDP Program Menesa bilong Kiribati, Tuvalu na Vanuatu, Navin Bhan, i bin tokim Pacific Beat, olsem em i no min olsem ol i no yusim gut ol dispela eid mani.

**Ol i pasim strike bihainim ol toktok wantaim gavman na**

**yunion**  
OL i pasim straik eksen long Solomon Ailans, bihainim ol toktok i bin kamap namel long gavman na ol tisa na pablik employis long kantri. Solomon Ailans Nesenel Tisa Yunion, SINTA, i bin askim long 18 pesen apim pe bilong halivim ol wantaim kos bilong ol samting i go antap. Tasol ol i bin tok orait long 4.5 pesen tasol, na ol i peim i go bek long Januari 1. Kros wantaim pablik employis yunion, SIPEU, i wok long go het yet, na ol i riferim pinis i go long Tred Dispiuts Panel. Ol yunion mausman i tok, bai ol i no inap tok orait long wanem mak i stap aninit long mak bilong pe ol i bin askim long en.

**Pacific BEAT**

Listen to Radio Australia  
101.9FM Port Moresby

4, 5, 6am & 4pm, 5pm  
including sport

Radio Australia's current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



KOMENTRI

Taim bilong tumbuna i bin gutpela moa?

SINDAUN bilong yumi tude long PNG i mobeta long taim bilong ol tumbuna bilong yumi o nogat?

Bipo, ol i nogat mobail fon, ol i nogat kain kain kaikai bilong ol waitman. Nau sapos yumi les long wokabaut i go painim poroman, yumi ringim em tasol long mobail.

Yumi laik sekim balens long benk akaun, yumi yusim mobail tasol.

Ating tude i mobeta laka?

Na olsem wanem long we bilong laip, sindaun bilong man, na pasin bilong lukautim gut yumi yet?

Sapos yumi lukluk long PNG tude, sampela samting we ol tumbuna bilong yumi i no nap save long en, nau i stap na yumi les long lusim long lukautim yumi yet.

Long makim namba 34 indipendens bilong kantri, yumi harim planti ol bikman i toktok long hevi kantri i bungim nau long sait bilong sik.

Dispela bikpela sik nogut ol i kolim kolera, na poro bilong em disenti i bagarapim tru gutpela sindaun bilong ol pipel bilong mipela long Morobe na ol ples klostu.

I tru, ating dispela sik kolera, em nem bilong en i nupela long yumi. Tasol em i kamap long yumi olsem wanem tru?

Kain sik olsem kolera na disenti, em sik bilong doti pasin. Em i sik i save bihainim pasin we i no klin na i no helti.

Tru tumas, bai yumi sindaun na skelim tingting long dispela hap tok klia tu o nogat?

Bai yumi les long painim gutpela kaikai na go baim ol hap mit na kumu i stap long sait bilong rot, ol i kukim antap long ol doti praipan o hap kapa, bihain ol i silip tasol antap long ol hap katen bokis nabaut.

Bai ol pikinini bilong yumi i lukim yumi mekim dispela, na ol tu bai bihainim tasol.

Sapos i gat wanpela bikpela skul, yumi ken kisim long dispela tupela sik poro, kolera na disenti. Em i dispela.

Ol pasin bilong yumi we i no moa klin, em yumi mas lusim. Sapos yumi no lusim ol, bai ol i pulim yumi go painim ol kain sik olsem kolera na disenti.

Gavman tu i mas luksave nau.

Inap long toktok long ol bikpela kain kain risos projek na ol nupela hotel bisnis gavman i laik kirapim. Lukluk long strongim helti pasin namel long ol pipel bilong yumi. Sapos pipel i no stap, bai olgeta ol dispela projek bai nogat as bilong ol.



Laipstail sik bagarapim taun lain

PLANTI manmeri long ol bikpela taun na siti olsem Mosbi i wok long kisim kainkain sik long bodi na skin bilong ol we dispela kain sik i no save kamap hia long Papua Niugini long bipo.

Kainkain yangpela manmeri kisim sik long bodi olsem lek solap, bros pen nating nating, blut i no ron gut, sotwin kisim ol nating, ai bagarap, na planti arapela moa. Na planti manmeri wok long lusim laip bilong ol nau bikos long ol dispela kain sik.

I tru olsem bikpela sik nogut yumi kolim sik AIDS i stap pinis long Papua Niugini na wok long kilim planti pipel bilong yumi. Tasol ol arapela sik we i wok long kamap long bodi tu i wok long kamap bikpela na daunim planti manmeri tu.

Dispela em mi kolim laipstail sik we wanem samting yumi kisim go insait long bodi bilong yumi i tanim bek na givim sik na bagarap long bodi bilong



yumi gen.

Mi bin lukim wanpela liklik pikinini krismas bilong em i olsem 4-pela krismas, em save kisim sik sotwin na traut nating nating. Papamama wok long karim em ron go kam long haus sik klostu klostu na baim kainkain marasin.

Na mi tingim gen dispela pikinini ya em i no manki bilong kaikai gaden kaikai taim em liklik pikinini yet i kam. Em kaikai botol kaikai bilong stua tasol na dring susu long botol tasol i kam inap em bikpela. Nau em 4-pela krismas na kus na sotwin wok long kisim em klostu klostu na mi tingim tasol olsem em nogat gutpela kaikai bilong banisim na strongim bodi bilong em bin stap long em taim em liklik yet.

Taim mi tingim ol bikpela

manmeri wok long kisim ol kainkain sik olsem mi kolim long antap, mi tingim olsem ating ol bikpela manmeri tu wok long kaikaim ol kainkain masta kaikai bilong stua na amamas gut tru stap tasol ol dispela kaikai nau i tanim bek long bodi bilong ol. Ol manmeri groa fat nogut tru na planti gris pulap long skin bilong ol. Ol dring planti bia tru na bia pulapim bel na blut bilong ol pinis.

Ol manmeri i no tingim kaikai bilong helpim bodi long sait bilong helpim blut, strongim bun, helpim lewa long pulim gut win na arapela helpim bilong bodi. Ol manmeri subim kainkain naispela masta kaikai go insait long maus na nau ol samting ya tanim bek na givim ol traipela bikbel, lek han solap, gris pulap long bodi, ai bagarap, kru bilong ol i no tingting klia moa na arapela hevi na bagarap moa.

Olsem na mi ting long dau-

nim dispela kain sik we i wok long kisim planti manmeri bilong ol taun na siti, yumi mas go bek long kaikai bilong yumi Papua Niugini stret. Ol gaden kaikai bilong yumi stret.

Yumi westim bikpela mani tru long haus sik na marasin bikos yumi yet i givim baksait long gutpela kaikai we i pulap tru long ol gutpela marasin bilong graun na wara bilong yumi yet long PNG.

Ol dispela kaikai inap strongim bodi bilong yumi na stopim yumi long ol dispela kainkain laipstail sik long bodi ya.

Yumi ken amamas long mani na save bilong yumi tasol wanem samting yumi subim go insait long maus bilong yumi inap bagarapim laip bilong yumi. Olsem na yumi mas tingim go bek long ples na tingim gaden bilong yumi na tingim ol dispela naispela kaikai we tumbuna na papamama bilong yumi save groim bilong yumi long kaikai.



Published Weekly, Thursday, for Ward Publishing Company, Ltd.

P.O. Box 1982 Goroka, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

Ples: PNG K220.00

AUSTRALIA US\$110.00

ASIA PACIFIC na JAPAN US\$150.00

AMERICA na EUROPE US\$210.00

General Manager Elizabeth Krumpa

Editor Neville Chri...

Printed at...

Office 2, Waigani Drive.

Ward Publishing Company Limited is owned by the Director General of Papua New Guinea - Catholic 50%, Lutheran 20%, Baptist 10%, United Church 10%. The company reserves the right to accept or reject any advertisement or other material submitted for publication which it deems contrary to the interests of its subscribers or the public. The publisher's general terms and conditions are available at Ward Publishing Company Ltd and are set out on the display advertising form.

# Moa ovasis sans i stap bilong ol PNG musik atis

**L**AS wik mi tokim yupela long ol sans i stap ovasis bilong ol PNG musik atis long go na mekim nem bilong ol long ol kain bikpela musik bung olsem Australasian Wol Musik Ekspo long Melbon Australia long mun Novemba dispela yia.

Mi bin tok dispela em i wanpela gutpela sans long opim ai na mekim nem bilong ol PNG musik manmeri long wol. Ol dispela kain sans, em ol PNG musik atis i noken abrusim. Ol i mas bungim dispela salens long kisim tingting na laik bilong ol arapela manlain long wol. Em wanpela rot tasol bai ol musikman bilong yumi i ken mekim nem long wol musik maket.

Nau em i taim tu bilong gavman bilong yumi long lukluk moa long ol dispela kain bung long apim nem bilong kantri bilong yumi ovasis.

Em bai no inap long mekim kain mani olsem bikpela LNG projek inap mekim, tasol em bai autim nem bilong kantri yet long sait bilong musik.

Minista bilong Kalsa na Turisim, Charles Abel yet em i wanpela musik man tu. Em i bin rekodim sampela albam na ol musik vidio klip tu.

Charles bai rait man bilong strongim nem bilong ol lokol musik atis na kisim sampela sapot long gavman bai ol musikman bilong yumi i ken mekim nem long wol. Sapos nogat, insait long Australasia na Pasifik rijen pas-taim.

PNG musik indastri i wok long painim ples bilong helpim ol atis bilong en, tasol em i wok kisim thalivim long ol praivet bisnisman husat i wok traim long lukautim gut, tasol em i bikpela hat wok tru.

Em dispela indastri i wok long promotim ol yut na ol yangpela i gat bikpela laik na save long musik.

Ol Papua Niugini musik atis bilong yumi i no save inap long go long ol kain bikpela intanesenel musik kibung, long wanem kos bilong ron long balus em i antap tumas.

Em nau ol i save abrus long ol dispela kain sans bilong autim nem bilong ol na kantri bilong ol.

Sapos Minista Abel inap long kamapim wanpela lo bilong karamapim PNG musik indastri aninit long kalsa na turisim ministry bilong em, bai em i gutpela tru.

Charles, mi givim salens long yu long sanap baksait long ol musik atis bilong yumi na kamapim ol rot bilong ol long go ovasis na soim sampela ol strong bilong PNG musik atis. Yu yet yu save olsem wanpela we long bruk i go insait long dispela intanesenel musik maket, em bilong salim strong na



save bilong ol musik atis bilong yumi.

Olsem mi tok, i gat planti sans i stap bilong ol atis bilong yumi long mekim nem bilong ol ovasis, tasol hevi em mani bilong ron long balus na baim rum slip. Ol samting ol musik atis bai kisim em i bikpela moa. Ol i ken mekim nem, na yu no save, nogut bai ol i kamap biknem tru long wol musik.

Em nau mi tingim narapela bikpela sans bilong ol musik atis bilong yumi long mekim nem long wol musik maket.

Narapela bikpela musik resis em Australian Performing Rights



**OWA YUNITI:** PNG i gat planti ol nupela atis i rekodim albam pinis, olsem ol Owa Yunits, na i gat planti ol musik manmeri i no rekod yet.



**CHOLAI:** Intanesenel rekoding atis, mangi Hohola, Aaron Cholai i bin rekodim ol jazz musik albam bilong em long Nu Yok.

Association (APRA) Vanda & Young Songwriting Competition.

Dispela Vanda & Young Songwriting Competition i save givim gutpela sans tru long wanpela songraita i gat save long mekim nem bilong ol na sapotim musik sariti, Nordoff-Robbins.

Dispela resis i op long olgeta songraita – we ol i pablisim pinis o no yet, ol profesenel an ol amata, lokol na intanesenel. Em i op long olgeta kain kain musik stail.

Harry Vanda na George Young

bilong Easybeats, em tupela biknem songraita long 70s, 80s, na 90s.

Dispela kain sans i ken mekim nem bilong ol musik atis long rekod long Studio 301 long Sidni, Byron Bay long Australia na Stockholm o Cologne long Yurop, o yu ken go na pilai laiv wanem singsing yu singim long Song Summit 2010 long Darling Harbour we i ron long 19 i go 21 Jun, 2010.

Sapos nogat, bai yu gat wanpela vidio prodaksen kru i stap long

rekodim vidio klip bilong yu.

Long winim 2009 Vanda and Young Song Competition, bai yu kisim bisnis klas ron long balus i go long US na UK, wantaim faivpela de rum slip long tupela kantri wantaim. Dispela em Showtravel i save givim, na manim mak bilong em inap long 10,000 Australia dola na narapela 10,000 Australia dola long Albert Music. Antap long dispela, bai yu kisim skul wantaim biknem songraita Paul Williams long Kensaltown Studios long London.

Long stap insait long dispela 2009 Vanda and Young Song Competition, yu ken sekim websait [www.VandaYoungSongComp.com](http://www.VandaYoungSongComp.com)

Entri fie m 50 Australia dola o 40 Amerika dola long wan wan song. Olgeta winmani long dispela resis bai go long sapotim Nordoff-Robbins Music Therapy Australia.

Ol entri bai pas long Trinde, Septemba 30, 2009 na wina bai ol i tokaut long en long Mande, Novemba 30, 2009.

I gat ol arapela sans tu i stap we ol musik atis bilong yumi i ken traim. Mi harim olsem studio Spaida Trakz i kisim askim long wanpela produsa bilong Radio Australia Pacific Break so, Steve Hassett long salim sampela ol gutpela musik bilong ol lain i no rekot yet long PNG. Hasset i bin laikim ol long salim i go long Pasifik Break musik resis bilong em.

Pacific Break 2009 i bin op long stat bilong mun Mas. Em i wanpela resis bilong painim ol nupela save-manmeri bilong musik insait long Pasifik. Ol wina em ol i flaim ol i go long Vanuatu long pilai laiv long fran bilong planti tausen manmeri long Fest'napuan, wanpela

bikpela musik festival i save kamap long hap.

Jeneral Menesa bilong Spaida Trakz, Ian Boas em Redio Australia i bin intavium em tu, long painimaut moa long ol nupela musik atis i salim musik i go long studio. Em i bin stori wantaim Namila Benson na Isabelle Genoux long ol nupela musik atis Spaida Trakz i kisim.

“Mipela i bilip ol lisena bilong mipela bai laik harim moa long Spaida Trakz projek bilong yupela. I mas wanpela gutpela sans bilong ol musik atis long save moa long musik bisnis,” Namila na Isabelle i tok. “Mipela bai amamas tru sapos ol dispela ol atis i ken stap insait long dispela resis. Mipela laik kisim moa long ol nupela Papua Niugini musik atis. Maski ol i no win long dispela musik resis, ol bai stap yet long Radio insait long Pasifik na long FM netwok bilong mipela long ol patna redio stesin bilong mipela.”

Las yia em namba wan yia bilong dispela Pasifik Break resis, na Santo Band 26 Roots i bin winim.

Dispela yia, i bin gat 70 entri i kam long 8-pela kantri bilong Pasifik, Solomon Ailans, Nu Kaledonia, Vanuatu, Tonga, Kuk Ailans, Fiji, Guam na PNG tu. Ol jas i bin sindaun las wik long painim wanpela wina.

Ol jas i sindaun tupela de olgeta long dispela wok na ol i sotim ol entri i kam long Vanuatu, Solomon Ailans na Tonga.

**Neks wik yu ken painim stori bilong wina bilong Pacific Break 2009 insait long Wantok Niuspepa tasol.**

**YUMIFM Redio Progam**

**Program bilong Wanwan De Mande - Fraide**

6am - 10am - Sankamap show - Host: KAS.T  
 6:15am - Komuniti Notis Bod  
 6:30am - Nius Hetlains / Bondei grittings  
 Trukai Rais - GES FAIA KOMPETISEN  
 6:45am - Niuspepa Hetlains  
 7:00am - Major Nius Bulletin - YUMIFM Nius Senta  
 7:15am - Toktok sapotim LO na JASTIS Sekta  
 7:30am - Trukai Rais - GES FAIA KOMPETISEN  
 8:00am - Major Nius Bulletin - YUMIFM Nius Senta  
 8:15am - Stori b'long Skelim Tingting

8:30am - Trukai Rais - GES FAIA KOMPETISEN  
 9:00am - Nius Bulletin - YUMIFM Nius Senta  
 9:15am - Luksave long Komuniti (Redio Pilai)  
 9:30am - Trukai Rais - GES FAIA KOMPETISEN  
 9:45am - YUMI PAINIM WOK Segment  
 10:00am - Nius - YUMIFM Nius Senta  
 10am - 2pm - Monin Trek na Belo Pack - Host: VAVIESSIE  
 10:10am - Lukatim yu yet - Helt toktok - RH Hyper Mart  
 10:45am - YUMI PAINIM WOK Segment  
 11:00am - Nius - YUMIFM Nius Senta  
 11:10am - Cont'd - Lukauti yu yet - Helt toktok  
 11:30am - Nius Hetlains b'long Belo Taim  
 12:00pm - Major Nius Bulletin - YUMIFM Nius Senta  
 12:10pm - BELO Taim - wantaim sapot b'long TELIKOM  
 12:15pm - Komuniti Notis Bod  
 12:20pm - BELO Taim - wantaim sapot b'long TELIKOM  
 1:00pm - Nius - YUMIFM Nius Senta  
 1:10pm - BELO Taim - wantaim sapot b'long TELIKOM

2:00pm - Major Nius Bulletin - YUMIFM NIUS SENTA  
 2pm - 6pm - Avinun Draiv Taim - Host: Enjo Dabix  
 2:00pm - 4:00pm (Tunde / Fondei) TOKAUT TOKSTRET  
 2:45pm - YUMI PAINIM WOK Segment  
 3:00pm - Nius - YUMIFM Nius Senta  
 3:10pm - Avinun cruz  
 4:00pm - NIUS - YUMIFM Senta  
 4:10pm - "FOAPELA KAM GUD LONG 4"  
 4:30pm - Nius Hetlains  
 4:45pm - YUMI PANIM WOK Segment  
 5:00pm - MAJOR NIUS BULLETIN - YUMIFM Nius Senta  
 5:10pm - 6:00pm - FLAME KULCHA (1 hr) listeners request  
 6:00pm - MAJOR NIUS BULLETIN - YUMIFM NIUS Senta  
 6 - 7pm - Maggi noodles request aua  
 6pm - 00am - NAIT BEAT - Host: ANGRA KENNEDY  
 6:10pm - 7:00pm Mun kamap sho  
 6:45pm - Komuniti Notis Bod  
 7:00pm - 9:00pm - COCA COLA GARAMUT

9:00pm - 00am - Nait Beat - Isi Cruz long nait  
 00am - 6am - BRUKIM TULAIT SHOW - Host: Papa Raegs / Sally / Nenge  
 00:00 - Early Monin Taim Cruz ( of lain brukim tulait shift)  
 - Musik / Request / Tok pilai  
 - Kipim Kampani long of nait shift.  
**Weekend Shift - Saturday & Sunday**  
 6:00am - 11:00am - Wiken Sanrais  
 6:30am - Komuniti Notis Bod - Bondei grittings  
 7am - 9am - Wiken Spots  
 9am - 11am - Monin Raun  
 11am - 1pm - National Weekly Hit Parade (Host Kas.T)  
 2pm - 6pm - Sarere Avinun Draiv  
 6pm - 00am - Nait Beat (Host Angra Kennedy)

YUMIFM POROMAN TEAM:  
 Turner (KAS.T) Arifeae - Team Leader / Program Director  
 Angra KENNEDY - Senior Announcer

# Raun wantaim Wantok

## Malolo taim em i taim bilong amamas

**DISPELA wik em tem tri malolo bilong ol sampela sumtin, ol komuniti skul i go hai skul insait long kantri. Sampela bikipela skul ol i no malolo yet.**

Planti bilong ol papa mama bai pulim win gut long dispela wan wik holide bilong ol pikinini, long wanem bai ol i no inap kirap long bik morning na stretim kaikai bilong ol na kisim ol gen go long skul.

Dispela wan wik malolo em las malolo bilong ol skul bipo ol bai go bek na skul inap klostu pinis

bilong dispela yia.

Planti bilong ol pikinini bai amamas long dispela wangepa wik malolo tasol ol papa mama bai stat gen long het pen long bungim mani bilong skul fi long yia i kam.

Sampela skul long sampela provins, ol i pasim skul bilong ol bipo long dispela tem holide long wanem sampela i sot long wara, sampela ol i painim sik long provins bilong na sampela i nogat tisa.

Wangepa wik em bikipela long ol

pikinini long wanem ol save kirap bik morning kisim taol na go waswas taim wara i kol, kisim uniform bilong ol putim na karim bek na go sanap long bas stop na resis wantaim ol wok manmeri long bas.

Planti bilong ol sumatin long bikipela siti ol bai askim papa mama bilong ol kisim ol go long nambis long waswas, sampela ples i klostu ol bai askim papa

mama long kisim ol go long ples long go malolo.

Ol sumatin long Siti sampela bai kisim taim long go long laibri long lukim ol buk na sampela gat home wok bai taim long painim helpim.

Mande 28 em taim bilong kirap long bik moning gen na stap sem kain pasin inap long dispela namba 4 tem bai pinis.



**HARIM TOK BILONG PAPAMAMA:** Wangepa wik holide bilong ol skul insait long kantri, taim bilong ol papamama gen long lainim ol pikinini bilong haus. Poto i soim ol sumatin bilong Noblet Ketlik skul i sindaun na harim toktok bilong tisa bipo ol i pasim skul. *Poto Nicky Bernard.*

**RADIO AUSTRALIA TOK PISIN PROGRAM**  
 HARIM LONG: 101.9 FM

Radio Australia Tok Pisin Program - MANDE

**Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Helain na Program Priviu  
 7.15PM Musik na Chit-Chat  
 7.30PM Nius na Karent Afes  
 8PM Youth  
 8.15PM Musik/Spots  
 8.30PM Nius  
 8.40PM Youth Riplei  
 8.55PM Musik  
 9PM Stesen Pas

**TUNDE**  
**Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Helain na Program Priviu  
 7.15PM Musik na Chit-Chat  
 7.30PM Nius na Karent Afes  
 8PM Mama Graun  
 8.15PM Musik/Spots  
 8.30PM Nius  
 8.40PM Youth Riplei  
 8.55PM Musik  
 9PM Stesen Pas

**TRINDE**  
**Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Helain na Program Priviu  
 7.15PM Musik na Chit-Chat  
 7.30PM Nius na Karent Afes  
 8PM Youth  
 8.15PM Musik/Spots  
 8.30PM Nius  
 8.40PM Youth Riplei  
 8.55PM Musik  
 9PM Stesen Pas

**FONDE**  
**Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Helain na Program Priviu  
 7.15PM Musik na Chit-Chat  
 7.30PM Nius na Karent Afes  
 8PM Youth  
 8.15PM Musik/Spots  
 8.30PM Nius  
 8.40PM Youth Riplei  
 8.55PM Musik  
 9PM Stesen Pas

**FRAIDE**  
**Moning - Nait**  
 6AM Stesen Op - Nius Hetlain - Musik na ol intaviu  
 6.30AM Nius na Karent Afes  
 7AM Stesen Pas  
 7PM Stesen Op  
 7.01PM Ol Helain na Program Priviu  
 7.15PM Musik na Chit-Chat  
 7.30PM Nius na Karent Afes  
 8PM Youth  
 8.15PM Musik/Spots  
 8.30PM Nius  
 8.40PM Youth Riplei  
 8.55PM Musik  
 9PM Stesen Pas

**SARERE**  
 Nait  
 7PM Stesen op - Ol Nius Hetlain/Program Priviu  
 7.05PM Musik na Chit Chat  
 7.30PM Nius  
 7.40PM Wantok  
 8PM Lokal Ben  
 8.30PM Nius  
 8.40PM Musik/Chit Chat  
 9PM Stesen Pas

**SANDE**  
 Nait  
 7PM Stesen op - Ol Nius Hetlain/Program Priviu  
 7.05PM Musik na Chit Chat  
 7.30PM Nius  
 7.40PM Femli Blong Serah (Redio Plei)  
 8PM Lukluk Bek Long Wik  
 8.30PM Nius  
 8.40PM Musik/Chit Chat  
 9PM Stesen Pas

**93FM YUMIFM**

**National Weekly Hit Parade:**

Sponsor: Digiki - Hagar, better network.

Host & Produced by: Kas.T

Week Ending: Saturday - 12<sup>th</sup> September 2009

Week Begins	Last Week	This Week	Charting Song	Artist
1	1	1	Meat & Potatoes	RJ Nigera
2	2	2	Trick Girl	Melting
3	3	3	ABR	Scotty Rabbit
4	4	4	Steady Love	Choko Band
5	5	5	Proty Girl	RJ Nigera
6	6	6	Blitz Me	Melting
7	7	7	Sharp Tom	Raidax & Ansona
8	8	8	Action Man	Texas Allan
9	9	9	Madlin	Raidax & Ansona
10	10	10	Sumangai	Giveaway string band
11	11	11	Tuti Mania	Simoni Hills
12	12	12	Flying Fox	Flames of Meke
13	13	13	Karex	Raidax & Ansona
14	14	14	Kakaba	Tuti Tuti
15	15	15	Single Prince	Raidax & Patti Patti
16	16	16	ibanset	Konanz & LG Family, Black G
17	17	17	Comari	Lalifazh
18	18	18	Vu yah lowa	Family n Bushoo
19	19	19	Rockerna	Fourstone of Kurling
20	20	20	Point Five	Choko Band
			Point Five	Choko Band
			Point Five	Texas Allan

### TV GAID

**FONDE SEPTEMBER 24, 2009**

5.00AM G JOYCE MEYER - Religious Program  
 5.30AM G TODAY  
 9.30AM MALOLO CLUB  
 School holiday specials to keep kids entertained with cartoons Go Diego Go; Kids Movies Prince of the Nile, Chicken Run; find out on the latest hi-tech gadgets on the market on Cybershak; and go on an exciting adventure to the zoo.

**CLASSROOM BROADCAST**  
 2.59PM STATION OPEN  
 KIDS KONA  
 3.00PM G G2G: GOT TO GO  
 3.30PM G HI-5 (new series)  
 4.00PM G SLEEPOVER CLUB  
 4.30PM G THE SHAK  
 4.57PM G EMTV TOK SAVE  
 5.00PM G THE SHAK  
 5.29PM G EMTV NEWS UPDATE  
 5.30PM G HOT SOURCE  
 6:00PM G NATIONAL EMTV NEWS

6.30PM G A CURRENT AFFAIR  
 6.59PM NEWS UPDATE IN TOK PISIN  
 7.00PM G SPORTS SCENE  
 7.30PM PG YOU SAVED MY LIFE  
 7.57PM EMTV TOK SAVE  
 8.00PM PG WWE AFTERBURN  
 9.00PM G ELITE MUSIC ZONE  
 9.30PM M FOOTY SHOW  
 11.00PM G NATIONAL EMTV NEWS REPLAY  
 11.30PM Australia Network

**FRAIDE SEPTEMBER 25 2009**

5.00AM G JOYCE MEYER - Religious Program  
 5.30AM G TODAY  
 9.00AM MALOLO CLUB  
 School holiday specials to keep kids entertained with cartoons Go Diego Go; Kids Movies Prince of the Nile, Chicken Run; find out on the latest hi-tech gadgets on the market on Cybershak; and go on an exciting adventure to the zoo.

**CLASSROOM BROADCAST**  
 2.59PM STATION OPEN  
 KIDS KONA  
 3.00PM G DOGSTAR  
 3.30PM G HI-5 (new series)  
 4.00PM G THE SLEEPOVER CLUB (Series Return)  
 4.30PM G THE SHAK  
 4.57PM G EMTV TOK SAVE  
 5.00PM G THE SHAK  
 5.29PM G EMTV NEWS UPDATE  
 5.30PM G HOT SOURCE  
 5.55PM G CRIME STOPPERS  
 6:00PM G NATIONAL EMTV NEWS  
 6.30PM G A CURRENT AFFAIR  
 6.59PM NEWS UPDATE IN TOK PISIN  
 7.00PM G IN MORESBY TONIGHT  
*All the latest in entertainment and arts around Port Moresby, and PNG, with a special feature segment, a weekly studio guest and a weekly highlights of what's on your screen.*  
 7.27PM EMTV TOK SAVE  
 7.30PM G NRL: 1ST PRELIMINARY FINAL (teams: tha)

9.45PM PG ELITE MUSIC ZONE  
 15PM M ARMY WIVES  
 ARMY WIVES - a television drama series that follows the lives of four army wives, their families, and an "army husband" whose wife is in the army.  
 11.30PM G NATIONAL EMTV NEWS REPLAY  
 Midnight Australia Network

**SARERE SEPTEMBER 26, 2009**

11.29AM STATION OPEN  
 11.30AM PG THE MUSIC JUNGLE  
 12.00PM G THE SHAK  
 1.00PM G ENGLISH SUPER LEAGUE REPLAY - St. Helens v Wigans  
 3.00PM G ENGLISH SUPER LEAGUE REPLAY - Leeds v Warrington  
 5.00PM G SPEED MACHINE  
 6.00PM G NATIONAL EMTV NEWS  
 7.30PM G NRL: 2ND PRELIMINARY FINAL Live (teams: tba)  
 9.50PM EMTV TOK SAVE  
 9.55PM G MORESBY TONIGHT

10.30AM G MORESBY TONIGHT  
 1.30PM NATIONAL EMTV NEWS REPLAY  
 Midnight Australian Network

**SANDE SEPTEMBER 27, 2009**

6:30AM G IT IS WRITTEN  
*It Is Written is an international, Christian television ministry dedicated to sharing insights from God's word with people around the world.*  
 7.00AM G HILLSONG  
 9.30AM G JAPAN VIDEO TOPICS  
 10.00AM G WIDE WORLD OF SPORTS  
 11.00AM G SUNDAY FOOTY SHOW  
 MIDDAY G SUNDAY ROAST  
 1.00PM G TOTAL RUGBY (New Series) The latest from the Tri Nations, including a chat with Fourie du Preez, plus we see rugby change the lives of prisoners in Fiji and a young Ugandan in New Zealand.  
 1.30PM PG WWE AFTERBURN  
 2.30PM G ENGLISH SUPER LEAGUE  
 4.00PM G PNG ORIGIN  
 2008 PNG Internationals vs PNG Residents



B	U	D	L	E	R	H	O	E	N	S	I	N	W	S	A	B	
J	A	M	I	N	T	A	L	D	E	B	U	T	I	P	Q	E	
R	O	M	A	S	I	N	O	K	E	S	M	A	L	E	M	N	
E	L	I	F	R	E	D	I	G	L	O	P	U	W	E	N	S	
S	A	P	B	A	T	E	R	I	R	L	F	E	I	K	U	I	
K	I	R	T	K	E	L	I	A	O	I	M	N	L	E	F	N	
I	N	T	A	N	I	S	E	N	L	I	S	T	I	M	A	S	
O	F	A	Y	A	M	E	S	T	R	A	I	M	I	L	I	R	
S	K	R	U	P	D	O	K	E	M	F	B	T	U	R	I	K	
I	L	O	P	E	R	I	T	U	N	R	A	K	G	M	M	A	
K	S	E	R	G	D	A	Y	O	B	E	I	K	V	A	I	P	
O	E	R	T	Y	B	Z	I	O	P	N	A	M	D	O	L	L	A
B	A	M	I	M	R	E	N	T	B	I	S	K	I	T	A	H	
A	I	N	I	S	N	E	D	O	U	I	O	P	I	U	O	I	
I	S	T	I	A	K	L	T	O	F	G	R	A	M	S	I	M	
G	A	T	E	R	B	O	N	A	S	O	D	L	U	B	W	I	
H	J	E	K	L	M	I	O	K	S	C	U	N	G	O	P	R	

Painim ol dispelatoktok: bilong wak mekanik

BAMPA	BATERI	BENSIN	BULDOZA	ENSIN
ENSINIA	GIA	GRABOKIS	GRS	GUMI
HANDEL	HATIM BATERIJEK		KA	KAPA
LEKTRIK	MASIN	MOTO	MOTOBAIK	MOTOKA
SEN	SKRIL	STIA	SITILAM	WILWIL

4	2				3	1	6	
	9			6		2	4	
		3		2	1	7		
	7	8	2	4			5	
			6		7			
	4			5	8	6	3	
		4	3	6		2		
	8		1				4	
2	5	7					6	3

2	4	5	7	9	3	1	8	
3	1	5	2	4	8	5	7	
7	8	5	3	1	6	2	4	9
4	9	7	1	6	2	5	8	3
8	2	3	4	5	7	9	6	1
6	5	1	9	8	3	7	2	4
5	3	8	7	2	1	4	9	6
9	6	4	8	3	5	1	7	2
1	7	2	5	9	4	8	3	5

SUDOKU bilong las wik isu...

W	E	D	A	R	W	A	T	E	M
M	E	D	E	S	E	C	E	A	M
A	H	I	M	U	A	S	A		
E	C	W	E	U	A				
A	N	O	B	A	C	A			
V	N	P	E	I	M				
R	U	P	E	I	M				
T	B	W	E	M	I	T	N	E	M
Z	A	N	E						
F	H	U	K	I	N	E	R	E	U
L	A	B	U	C					
M	A	B	E	P					
I	M	A	B	E	L	H	E	R	E
T	M	A	B	E	L	H	E	R	E

PAINIM NEM bilong las wik isu...

TORO



BIABIA



KANAGE



TOKWIN...

**Mi no inap pinis-PM**  
 Long 34 krismas bilong yumi, Sif bilong Papua Niugini i mekim bikipela toktok bilong em, em bai i no inap pinis yet bihain long PNG i wokabout stret long gutpela rot. Em mekim ol dispela toktok long Laiwaden Oval long Madang. Yu save, sif yah. Taim em toktok, em i save bihainim tasol! Na husat bin kamapim ol giaman toktok olsem sif i bin dai long Malaysia long wanpela wok raun bilong em? Kokonas bilong Sepik i no drai yet. I strong na sanap yet. Yu man tru yu rausim!

**Sumatin ripota bilong Yunivesti Ov PNG winim Miss Hiri Kwin resis...**  
 Wanpela yangpela sumatin bilong Yunivesti Ov PNG i winim Miss Hiri Kwin Resis na em wanpela Jenolisim sumatin. Nem bilong em, Tumanu Korema Ranu na em bilong Lealea na Gaire viles. Tisa o leksera bilong em Leo Wafiwa i mas amamas tru long sumatin bilong em. Ating Midia grup nau mas tingting long sponsaim wanpela wokmeri bilong midia long resis long Miss PNG Kwest. Em bai kisim stret! Yu ting wanem?

**Yumi selebretim Independens, sampela nogat...**  
 Planti hap long PNG i wok long selebretim Independens i stap na long Morobe Provis long ples Mumeng bikipela pait i bruk na wanpela yangpela man i dai long dispela pait. Dispela pait i bin kamap long husat i gat rait long papa long ol diwai yangpela yut mangi i bung na kilim wanpela man bilong ples Timini. Kamon PNG, yumi olsem wanem? Lusim pasin bilong tumbuna na yumi lukluk fuitsa bilong yumi long wok bung wantaim. Maski pait nating long diwai na graun we taim yu dai yu no inap karim ol wantaim long matmat bilong yu! Yusim het!!

Tokwin Tasol...

TV GAID

MANDE SEPTEMBER 28, 2009

6.00PM	G	NATIONAL EMTV NEWS
6.30PM	PG	HOME MADE
7.30PM	G	60 MINUTES
8.30PM	M	SUNDAY NIGHT MOVIE PREMIERE: LAWS OF ATTRACTION (2004) Comedy/Romance - Amidst a sea of litigation, two New York City divorce lawyers (Moore, Brosnan) find love. Stars: Pierce Brosnan, Julianne Moore
8.27PM	G	EMTV TOK SAVE
10.30PM	G	HEALING PLACE TV
11.00PM	G	NATIONAL EMTV NEWS REPLAY
11.30PM		Australia Network

5.30PM	G	WHO WANTS TO BE A MILLIONAIRE - HOT SEAT
5.55PM	G	CRIME STOPPERS
6.00PM	G	NATIONAL EMTV NEWS
6.30PM	G	A CURRENT AFFAIR
7.00PM	G	TOK PIKSA
7.30PM		20 TO 1: "Big Screen Buddies"
8.30PM		PASTOR JOSEPH KINGAL MINISTRIES: God Wants To Multiply Your Life, Pt I
9.00PM	PG	THE FARMER WANTS A WIFE
10.00PM	PG	THE FARMER WANTS A WIFE- Tonight's episode is full of revelations, twists, a few tears and a whole lot of love. The seven single farmers return to the Hunter Valley, to reveal to Natlie Gruzlewski, who they have chosen to pursue a relationship and perhaps a life on the farm. (Season Final)
11.00PM	G	NATIONAL EMTV NEWS REPLAY

TUNDE SEPTEMBER 29, 2009

5.00AM	G	JOYCE MEYER Religious program
5.30AM	G	TODAY
9.00AM		EMTV PRIME TIME LINE UP
2.59PM		STATION OPEN
KIDS KONA		
3.00PM	G	NEW MACDONALD'S FARM
3.30PM	G	HI-5
4.00PM	G	STREETSMARTZ
4.30PM	G	THE SHAK
4.57PM	G	EMTV TOK SAVE
5.00PM	G	HOT SOURCE
5.30PM	G	WHO WANTS TO BE A MILLIONAIRE - HOT SEAT
6.00PM	G	NATIONAL EMTV NEWS
6.30PM	G	A CURRENT AFFAIR
6.57PM		NEWS UPDATE IN TOK PISIN
7.00PM	G	HAUS & HOME
7.57PM		EMTV TOK SAVE
8.00PM	PG	PREMIERE SPECIAL
HEX HEX IT'S SATURDAY, THE DEFINITION		

Hey Hey we're back! Hey Hey It's Saturday is bursting back onto your screens with 2 reunion specials featuring the original gang and many of your all-time favourite segments.

TRINDE SEPTEMBER 30, 2009

5.00AM	G	JOYCE MEYER Religious Program
5.30AM	G	TODAY
9.30AM		EMTV PRIME TIME LINE UP
CLASSROOM BROADCAST		
2.59PM		STATION OPEN
KIDS KONA		
3.00PM	G	G2G: GOT TO GO
3.30PM	G	HI-5
4.00PM	G	STREETSMARTZ
4.30PM	G	THE SHAK
4.57PM	G	EMTV TOK SAVE
5.00PM	G	THE SHAK
5.29PM	G	EMTV NEWS UPDATE
5.50PM	G	WHO WANTS TO BE A

5.55PM	G	CRIME STOPPERS
6.00PM	G	NATIONAL EMTV NEWS
6.30PM	G	A CURRENT AFFAIR
6.57PM		NEWS UPDATE IN TOK PISIN
7.00PM	PG	THE WORLD AROUND US
Wildlife Man with David Ireland: Sea God		
"Sea God" is arguably the most extreme shark film ever produced and one of the "wildlife Man's greatest achievements. In this episode Wildlife Man, David Ireland goes in search of a Fijian God, a huge bull shark.		
8.15PM	M	SEA PATROL III:
9.15PM		WEDNESDAY NIGHT MOVIE
PREMIERE: THE RED PLANET		
(2000) Sci-Fi/Action/Thriller - Astronauts search for solutions to save a dying earth by searching on Mars, only to have the mission go terribly awry. Stars: Val Kilmer, Carrie-Anne Moss, Benjamin Bratt		
11.30PM	G	NATIONAL EMTV NEWS REPLAY

# Raun wantaim Kanage olgeta wik

## Hombro pasim rot

KANAGE em bilong Sepik na man bilong dring hambro stret. Wanpela taim em i laik go raun long Lae siti. Long taim bilong kisim sip, Kanage i bungim ol poroman na ol i go dring hambro long banana kem long Bialla. Ol i dring i go tulait na Kanage i lus tingting long go long bris long kalap long sip. Ol i go bikhet long Bialla taun na ol polis i holim ol na lokim ol long sel. Kanage i silip na driman olsem em i silip long sip i go long Lae. Tasol taim boi kirap, driman bilong em popaia. Em i no wanbel long ol poroman bilong em na em i tokim ol, "Yupela wokim na mi no kalap long sip. Yupela mas baim nupela tiket bilong mi. Sapos yupela i no baim tiket, em orait. Tasol sapos yu kam long Lae, bai mi dring hambro na wetim yu long bris. Bai yu kisim bikipela pen na swim i kam bek long Bialla."

Dema Leny  
Bialla

## Het Win

WANPELA man Awi i spak wantaim Kanage, wanpela boi Finsafen. I no long taim tupela kros long hap spia smuk. Awi belhat na givim wan long Kanage. Tasol Kanage em wanpela hap man tu ya, olsem na em givim wantu long Awi i go silip krangi long baret. Long moning ol famili bilong Awi i askim em long wanem samting i mekim na pes bilong em solap. Awi stori olsem, "Mi wantaim Kanage i dring, spia sot, mi bel kaskas. Mi pans, Kanage pans, mi pans go lep rait tasol Kanage lin daun na mi het win!"

Leni  
Mosbi

## Pasin bilong giaman tasol

KANAGE i bilong Kerema na em i kros wantaim meri bilong em na go antap long diwai. Em laik kalap i go daun na kilim em yet. Olgeta manmeri long ples i kam bung na singaut long em, tasol em i strong tru long kilim em yet. I no long taim na meri bilong em singaut, "Olsem wanem long ol pikinini bilong mitupela? Kanage kirap bekim, "Em bilong yu!" ol manmeri i wokim i go tuhat nogut tru, bikos diwai tu i antap moa na Kanage sindaun long wanpela liklik han bilong diwai ya. Wanpela i isi tasol go antap long diwai. Em i go klostu long Kanage na meknais long diwai. Olgeta tewel bilong Kanage ronawe na em bikmaus, "Yu faset! Yu laikim mi long pundaun na dai o wanem?"

Nelson Kolma  
Hagen

## Kokora Kora

KANAGE i go raun long Kerema taun. San i hat nogut tru na nek bilong em tu i drai olgeta. Boi i go kamap long wanpela liklik tred stua bilong ol asples



Kerema yet na laik baim wanpela sof-dring. Kanage askim long wanpela Coca Cola. Tasol stuakipa i no harim gut na em ting Kanage askim long 'kokora kora', long tokples bilong ol minim 'diwai kakaruk'. Olsem na stuakipa i go long frisa na kisim wanpela kakaruk i kam na tokim Kanage, "Sori brata, no gat diwai kakaruk. Mipela gat frozen kakaruk tasol."

Ian Kakarere  
Kiunga

## Bikipela Snek!

KANAGE wok olsem wanpela haus boi bilong wanpela waitman long Lae, Morobe Provins. Wanpela de, bosman bilong Kanage i wok long opis i stap na Kanage i go raun long bus arere long haus. Em raun i go na em lukim wanpela

bikipela mama snek stret. Man em pret olgeta na givim siksti i go long haus na tokim bosman, "Masta! Masta! ai rukim bikipela snek na mi seeem nogut tru!"

Ketta Som  
Finshafen

**Ol skwat!**  
Salim ol gutpela Kanage tok pilai i kam long:  
**Kanage Tok Pilai**  
P.O. Box 1982,  
Boroko, NCD  
Port Moresby.  
Bai yu i gat sans long winim "Raitman Kanage" t-siot!



**NEM: Itex Kukari**  
**KRISMAS: 17 (meri)**  
**ADRES: Barema Primary School, P.O. Box 320, Bialla, West New Britain Province**  
**SAVE LAIKIM: Go lotu, pilai soka, tas ragbi, harim gospel musik na ritim buk**

**NEM: Dama Lenny**  
**Krismas: 15 (man)**  
**ADRES: Kabaya Primary School, P.O. Box 39, Bialla, West New Britain**  
**SAVE LAIKIM: Pilai soka, raitim pas, ritim buk, mekim pani, harim stori, harim musik na pilai ragbi**

**NEM: Karl Pewa**  
**KRISMAS: 35 (man)**  
**ADRES: P.O. Box 1984, Lae, Morobe Province**  
**SAVE LAIKIM: Harim musik, ritim Baibel, go lotu.**

**NEM: Freddy Alena**  
**KRISMAS: 19 (man)**  
**ADRESS: Juandu Perish, P.O. Box 220, Kanabea, Kerema, Gulf Province**  
**SAVE LAIKIM: Mekim pani, pilai soka, lukim TV, na raitim pas**

**NEM: Felix M Zezogo**  
**KRISMAS: 21 (man)**  
**ADRES: Limki Baptist Church, P.O. Box 4099, Lae, Morobe Province**  
**SAVE LAIKIM: Pilai spot, raitim pas, harim musik, mekim pren na go lotu**

**NEM: Christy Mahmoi**  
**KRISMAS: 20 (meri)**  
**ADRES: P.O. Box 577, Maprik, West Sepik Province**  
**SAVE LAIKIM: Pilai spot, go lotu na raitim pas**

**NEM: Martha Ret**  
**KRISMAS: 20 (meri)**  
**ADRES: P.O. Box 577, Maprik, West Sepik Province**  
**SAVE LAIKIM: Pilai spot, raitim pas, mekim pren na go lotu**

**NEM: Petrus Apena**  
**KRISMAS: 16 (man)**  
**ADRES: Kamina Primary School, P.O. Box 90, Kerema, Gulf Province**  
**SAVE LAIKIM: Mekim pani, lukim TV, pilai volibol, raun long bus**

**NEM: Loretha Tinchel**  
**KRISMAS: 25 (man)**  
**ADRES: P.O. Box 577, Maprik, East Sepik Province**  
**SAVE LAIKIM: Pilai spot, go lotu, raun raun na mekim pani**

**NEM: Lodisia Tinchel**  
**KRISMAS: 15 (man)**  
**ADRES: P.O. Box 577, Maprik, East Sepik Province**  
**SAVE LAIKIM: Pilai spot, mekim pani, raitim pas na go lotu**

**Painim Tok!** Raitim daun wanem pani samting yu ting i gutpela insait long babol long poto...

**BAI YU WINIM WANPELA WANTOK T-SIOT O LAPLAP!**

Salim i kam long: **Pani Toktok Kompetisen, P.O. Box 1982, Boroko, NCD Port Moresby** - Sapos mipela i lukim wanem samting yu taitim i gutpela bai yu winim wanpela Wantok T-Siot o laplap na bai mipela i pulim i go insait long papa.

Nem: \_\_\_\_\_ Adres: \_\_\_\_\_

Tokmas bilong yu \_\_\_\_\_ Telapon: \_\_\_\_\_

Yu baim Wantok nrasopas long wanora hap \_\_\_\_\_

(Rot: Maket, Stab) \_\_\_\_\_

Kefim long bin \_\_\_\_\_

# NASFUND mekim wok long bungim laik bilong LNG projek

I GAT bilip Likwifait Netseral Ges projek bai kamapim planti sans bilong mekim wok bisnis.

Wanpela bilong dispela ol samting we bai kamap em long painim ol haus bilong putim tausen wokmanmeri ol bai kamapim.

Wanpela LNG projek we InterOil bai go pas long em i tok em bai kamapim inap olsem 5000 wok.

Na wankain namba o moa long dispela em narapela LNG projek we ExxonMobil bai kamapim.

Dispela i min moa long 10,000 ples i mas redi long givim ples long dispela ol wokmanmeri long stap na wok.

Long dispela as NASFUND (NASFUND), oganaiesen we i lukautim seving bilong ol manmeri i wok long praiwet kampani i tok em i stat long mekim ol haus nau.

Moa long laik bilong LNG FAN i tok i gat ol arapela samting i stap tu we i lukim em i mas kamapim wok bisnis long haus.

Dispela ol narapela samting em:

- PLANTI bilong ol haus we i stap nau i bilong bipo na olsem ol i bagarap na olsem i gat laik long nupela ol haus i mas kamap na

- PLES o graun bilong mekim wok bisnis na ples bilong silip i sot o nogat developmen long kamapim kain wok olsem na nau laik i wok long kamap bikpela;

NASFAN i tok long lukim wok bisnis bilong em long haus i ken stap na sanap long ol taim i kam

bihain dispela tupela as i bikpela samting long em.

Na laik bilong LNG long kisim haus i namba tri haus.

"Em i olsem taim mipela i mekim ol haus ol wokman bilong LNG projek bai kam tasol na rentim wanem ol ap mipela i kamapim."

"Ol i no ken painim ol haus."

"Na sapos ol i go mipela i gat ol arapela lain husat bai kisim na em dispela tupela as long antap em long ol manmeri i painim ol nupela haus long stap na ol bisnis lain i painim nupela ol ples long mekim bisnis."

"Save bilong laik bilong LNG i kam bihain long tingting em FAN i gat long wokim ol haus," Rod Mitchel, wanpela bilong ol sif eksekutiv opisa bilong FAN i tok.

Em i tok stat long nau FAN bai kisim tripela krismas long mekim haus projek.

Em bai wokim ol haus long Godons, Hohola na Waigani.

"Long sampela as na abrus gavman i pasim LNG projek, dispela bai lukim mipela i go insait long mekim wanpela 45 apatmen kompleks (haus) we mipela i kolim "The Edge" long Haba Siti. Long dispela taim i kamapim tripela haus long Haba Siti long mak bilong K115 milien.

Wanpela haus em i pinisim na dispela haus em Australia Niu Silan (ANZ) Benk i yusim olsem het opis bilong em na bai stap olsem ANZ Haus.

Long narapela tupela haus wanpela we em bai yusim olsem haus silip em bai kolim Sol Wara Haus na opis em bai kolim Ravalian.

# "Yu kisim we!" opim nupela hadwea



AMAMAS: Ol wokman amamas long opim bilong nupela Hardware Haus stua. Foto: Nicky Bernard

NUPELA hadwea stua Hardware Haus, i lukluk long apim mak bilong sevis bilong em i go antap.

Dispela i bihain long em i opim nupela Hardware Haus klostu long olpela wea haus bilong Steamships Hardware long Waigani long Tunde dispela wik.

Em bai apim mak bilong sevis long kain ol samting em bai salim, sistem em bai yusim long givim sevis, bungim kain sevis ol kastoma bilong em i laikim na long trenim ol wokmanmeri bilong em long nupela

samting ol bai lainim.

Bikpela as tingting bilong em long mekim olsem em long em i laik skruim yet wok bilong em olsem wanpela profesinal hadwea kampani long kantri.

Dispela em long lukluk bilong em long ol rot we ol bikpela bisnis i save yusim long mekim wok bilong ol na painim ol.

"Mi sanap long dispela apinun na laik tok olsem mi amamas tru long makim maus bilong wanpela profesinal hadwea bilong kantri.

"Ekpiriens na save bilong mipela long salim kain ol samting i mekim mipela i namba wan.

"Mipela i laik skruim dispela wok na wantaim opim bilong nupela hadwea bai kamapim nupela ol samting. Mipela bai salim ol samting ol manmeri, kastoma bilong mipela i laikim na givim sevis ol i laikim. Moa yet mipela bai salim ol wokmanmeri bilong mipela i go long lainim ol nupela samting," Ian McCulloch, Menesa bilong hadwea i tok.

# Kopi i gat strong olsem gol, wel na ges

## Sape Metta i raitim

Kopi Industri Koporesen (CIC) i askim ol kopi groa long tripela hailans provins nau long holim pas tru wok bilong kopi long wanem bikpela mani bilong gol, wel (oil) na ges bai i kamapim ol bikpela senis long ol ples.

Bosman bilong CIC, Ricky Mitio, i tok kopi i mas kamap bun tru bilong painim moni bilong kamapim gutpela sindaun long ol manmeri long ol provins bilong Isten Hailans, Western Hailans na Simbu.

Em i tok ol kopi groa long dispela tripela provins i no holim na mekim gut wok long kopi bilong ol, na tru tumas ol bai kamap

olsem ol kago boi bilong ol provins bilong Enga na Sauten Hailans husat i go pas nau long kisim planti milion kina long gol, wel, na ges long ol provins bilong ol.

Mista Mitio itok CIC i kiism luksave long senis we bai i ken kamapim hevi olsem na koporesen i kamap wantaim tingting bilong senisim tu pasin na tingting bilong bungim ol kopi growas long ol i mas bung long ol grup o kamapim asosiesen long kamap strongpela grup long planim na kamapim ol kopi na tu ronim ol kopi bisnis.

Em i tok tu olsem ol kopi growa i gat bikpela graun na bus we ol i ken salim long ol lain husat i ronim ol bikpela projek na tu

long ol manmeri long ol provins we wok na developmen bilong gol, wel na ges i bagarapim pinis gutpela graun bilong ol long wokim gaden na kamapim ol kaikai.

Nau yet CIC i gat luksave olsem kopi i wankain olsem gol, wel na ges we em i ken helpim planti manmeri painim gutpela sindaun, Mista Mitio i tok.

"CIC i gat strongpela tingting tu olsem rot em i stap long ol liklik manmeri long kamap ol mani manmeri long wok bilong kopi," em i tok.

Em i tok CIC i kamapim pinis sampela gutpela rot long helpim ol smolholda o liklik groa long dispela tripela provins.

# Senisim maining ekt

## Michael Novingu i raitim

**Askim i go long ol 109 memba bilong palamen (MP) long vot long nupela maining ekt o bil long givim 100 pesen (%) rait long ol papagraun long ol risos i stap long graun bilong ol.**

Tok lukaut i go wantaim dispela askim em sapos ol MP i no mekim dispela, ol papagraun bai pasim ol wok maining long kantri.

Memba bilong Not Flai, Boka Kondra, las wik long Madang i mekim dispela toktok long samting olsem 60 papagraun bilong ol

hap we ol wok maining i kamap.

Mista Kondra i tok ekt ol i laik vot long en i no bilong bagarapim gavman. Nogat. Dispela ekt i bilong kirapim gutpela sindaun bilong 6.5 milion manmeri bilong Papua Niugini (PNG).

Em i tok lo bilong maining i stap long Seksen 5 long Maining Ekt 1995, Seksen 6 long Wel (oil) Ges 1968 i brukim Mama Lo bilong kantri na ol rait bilong ol papagraun long papa tru long ol risos long PNG.

"Mama Lo bilong mipela i tok klia long Seksen 53 olsem ol risos i stap antap, aninit, long

graun na solwara em bilong ol papagraun," Mista Kondra i tok.

Em i tok olsem ol papagraun i save kisim liklik win mani tumas long wok ol narapela kampani i mekim long graun bilong ol.

Ol papagraun husat i bin stap long dispela bung long harim toktok bilong Mista Kondra i bin bilong ol provins bilong Sauten Hailans, Westen Hailans, Isten Hailans, Enga, Morobe, Westen, Sepik, Galp, Morobe na Madang.

# Ol papagraun laik kirapim bikpela papagraun asosiesen

## Michael Novingu i raitim

OL PAPAGRAUN long ol hap we wok maining i wok long kamap long Papua Niugini (PNG) i pasim tok long wanpela bung bilong ol long Madang las wik long kirapim wanpela maining papagraun asosiesen.

Siaman bilong Kurumbukari Papagraun Asosiesen long Madang, Toby Barre, i tokim ol papagraun i stap long bung long wankain long kirapim asosiesen bilong ol long i gat sapot long karimaut wok bilong ol.

Mista Barre i tok, "Busgraun bilong mipela i bagarap pinis. Taim wok maining i pinis mipela bai stap long hevi.

"Ol pikinini bilong mipela long taim bihain bai i stap long hevi. Bai i nogat busgraun long lukautim sindaun bilong ol."

Em i tok moa olsem long kibung bilong ol long Lae, Morobe provins, bihain long tripela wik, bai ol i makim ol eksekutiv bilong ol long lukautim asosiesen bilong ol.

Mista Barre i tok bung bai kamap long Lae i no long wok politik long rausim gavman. Nogat. Dispela bung em i bilong givim sapot long ol 109 memba bilong palamen long vot long senisim ekt long givim 100 pesen (%) rait long ol risos bilong ol papagraun.

# Wok glasim long kaukau bai strongim industri

**Bustin Anzu i raitim**

**WOK glasim i wok long kamap nau long painim aut wanpela rot long rausim sampela sik nogut i wok long bagarapim ol kaukau insait long Papua Niugini (PNG).**

Dispela rot em ol i kolim long Patojen Testing (Pathogen Testing o PT).

Insait long namba 9 Didinet, projek saintis Dorcas Homare i tok kaukau (sweet potato) industri long Kwinnslen (Queensland),

Australia, i bin kamapim ol gutpela kaukau taim ol i mekim wok glasim wantaim PT. PT i mekim ol kaukau i karim planti na ol lip i gro gut.

Em i tok olgeta fama bilong kaukau long Kwinnslen nau i yusim 100 pesen (%) PT rot na dispela i

helpim ol long kamapim gutpela kaukau.

Dispela i helpim ol tu long strongim maket bilong ol na ol i yusim 25-50 hekta, moa long pastaim, long planim kaukau.

Dispela rot em nau ol i yusim long NARI Hailans Rises Senta

long Aiyura long Isten Hailans provins, Homare i tok.

Australian Senta bilong Intanesenel Agrikalsa Rises, Kwinnslen Praimeri Industri na Pisari, na Fres Produksion Developmen Ejensi i wokbung wantaim NARI long mekim dispela wok.



MI GIVIM: Gahuku Rurel LLG presiden Jeffery Sasuwo (lephan) i givim K60, 000 sek i go long PNG Pawa Goroka Brens Menesa Henry Pirah na supavaisa bilong em Songat Hayai. Dispela em bai karamapim peimen bilong ol meteriol bilong pulim pawa i go long Lapegu hauslain.

Poto: Sape Metta.

## I gat lo na oda hevi daunim sevis long Siane

**Eric Sinebare i raitim**

PAPUA Niugini (PNG) i gat 34 krismas nau, na ol ples na manmeri i mas lukim sampela senis. Sevis i mas i stap.

Ol lo na oda hevi i mas pinis, na ol manmeri i mas i stap gut. Provinsel polis komanda bilong Simbu provins, supaintenden Joseph Tondop, i mekim dispela tok long Movi Praimeri Skul las wik Trinde, taim skul i bung long amamasim namba 34 yia Independens anivesari bilong kantri. Skul i bin askim Mista Tondop

long toktok long ol long dispela bung.

Mista Tondop i tok olsem ol manmeri long Siane i gat gutpela graun, ples, na rot. Planti samting i stap long helpim sindaun bilong ol, tasol, i gat hevi bilong lo na oda.

Em i tok olsem long dispela as i gat tingting nau long wokim wanpela polis stesen long Siane na putim ol polismanmeri long hap long mekim wok lo na oda.

"Planim na smuk spak brus na ol arapela trabel we i save kamap long Siane i mas pinis," em i tok.

## Kaunsel presiden bringim sevis long pipel bilong em

**Sape Metta i raitim**

INFRASTRAKSA developmen na ol arapela sevis olsem pawa, wara saplai na ol rot i go long ol lokal manmeri long ol rurel viles na hauslain em i bikpela samting.

Wankain sevis em ol manmeri i save kisim long ol taun na siti em ol lain long ples tu i mas kisim.

Wanpela kaunsel presiden nau i mekim nem long go pas long lukautim etpela kaunsel wod bilong em insait long Gahuku Lokel Level Gavman (GRLLG).

Jeffery Sasuwo husat i go pas long lukautim etpela kansel wod i tok em i taim nau long ol lokal pipel long ples i mas kisim ol gutpela sevis bilong wara saplai, pawa na rot na tu ol arapela sevis em ol i ken kisim helpim long en long ples.

Em i tok long las 34 yia

i go pinis bihain long PNG i bin kisim independens i nogat wanpela gutpela sevis i bin i go insait long ol lokal viles na hauslain.

"Long dispela ol yia, maski sapos yumi i bin kisim independens na self gavman, yumi i sindaun na mekim planti hatwok long ples. Na laip em i no bin isi long dispela ol yia i kam na i go. Yumi bin sindaun wankain tru olsem ol tum-buna long bipo taim," Mista Sasuwo i tok.

Em i tok nau yet ol dispela ol etpela kansel wod long Gahuku rurel LLG aninit long lukaut bilong em bai i ken lukim planti sevis na developmen na ples tu bai senis.

Mista Sasuwo i bin mekim dispela ol toktok long taim em i bin givim K60, 000 i go long PNG Pawa long pulim pawa i go long Lapegu hauslain, Marasin bris na i go olsem long Siave Komuniti Skul.

Dispela wan kilomita rurel ilektrifikesen projek bai putim bikpela lait long ol hauslain na long pes bilong ol manmeri na pikinini tu long ol viles i stap klostu long Lapegu.

Mista Sasuwo i tok fan bilong dispela ol projek em i kam yet long nesenel gavman. Na GRLLG i bin kisim K229, 000 olsem sapot baset bilong developmen bilong ol viles sevis.

Long wankain taim tu Mista Sasuwo i bin givim K12, 000 i go long kirapim wok bilong wara saplai projek long Nagamiufa hauslain na K10, 000 long Sipiga na Narepaga wara saplai projek.

Ol sios grup, mama na yut grup na ol arapela asosiesen grup long ol hauslain long GRLLG kaunsel wod eria i kisim tu ol helpim i kam long LLG long kirapim ol projek long ples na helpim ol yet.

Mista Sasuwo i salensim ol provinsel na nesenel lida long ol i mas lukluk tu long helpim na sapotim ol lain long ples wankain olsem ol i save mekim long ol taun na provins bilong ol.

Na ol kaunsel long dispela etpela wod long GRLLG i tok amamas long Mista Sasuwo long wok hat na brigim ol sevis i go insait long wanwan wod eria bilong ol.

Wod 4 kaunsel Goma Homate i tok nau ol lokal pipel i kisim luksave long ol lokal level gavman we em i stat long bringim ol sevis i go daun long ol bihain long tripela ten go krismas.

Em i tok amamas na tenkyu long lidasip bilong Presiden Sasuwo husat i mekim na nau ol pipel long ol hauslain i stat long kisim ol sevis.

## Smol holda growas kamapim moa kopi

**Sape Metta i raitim**

KOPI Industri Koporesen (CIC) het opis long Goroka i kamapim wanpela ripot we i soim olsem ol smol holda growas long Isten Hailans provins i kamap nambawan produsa bilong kopi long PNG.

Ripot i tok olsem ol smol holda growas i kamapim planti kopi bek long las tripela yia long provins.

Na ekonomis bilong CIC, Bruce Tinai, i tok Isten Hailans smol holda growas i kamapim moa kopi long 2008 sisen.

Ripot bilong kopi yia long 2005, 2006 na 2007 i soim olsem ol Isten Hailans smol holda growa kamapim klostu long 762 tausen bek long 2007. Dispela namba em i go antap long 12 tausen beg long 2006.

Westen Hailans smol growas i bin kamapim 332 tausen bek long 2006 na kalap i go antap

wantaim 23 tausen beg long 2007 long kamapim klostu long 347 tausen beg.

Kopi yia ripot bilong CIC i soim tu olsem kopi mak bilong ol smol holda em i bin pundaun long tri tausen beg i go long 27 tausen beg long 2007.

Ripot i go moa na i tok ol plentisen i kamapim 44 tausen moa beg kopi long 2007 na kamapim 128 tausen beg moa long 83 tausen beg long 2006.

Milen Be provins i kamapim 51 beg long 2007 na ol arapela 12-pela provins husat i save groim ol kopi i kamap wantaim ol wakain namba bilong ol beg kopi.

Tasol Morobe na Simbu provins i kamapim na dabolim namba bilong ol beg kopi long 2007.

CIC bai bringim kopi yia ripot bilong yia 2008 long pinis bilong Oktoba.



WASWAS: Peter Pokawin i resis long Theodist nesanel sempionsip bilong swim long Mosbi las wik Sarere. Em i brukim olupela rekot bilong Ryan Pini. POTO: PNGSI



TAITIM BUN: Harlequins (lephan) na Royals i taitim bun long wanpela skram long Lae ragbi union resis las wik. POTO: Bustin ANZU.



PAIT: Able Mekere (sanap) i pait wantaim John Ali long Karate sempionsip long Lae las wiken. POTO: Bustin Anzu.

GRUP POTO:  
Alotau Netbol  
Asosiesen ofisol,  
Marylou  
Ferdinandez (lep-  
han) i sanap wan-  
taim Alotau anda  
15 netbol skwad  
husat ol i go long  
Manus las wik  
Fraide long  
nesanel netbol  
sempionsip long  
train na winim bek  
taitol bilong ol.  
POTO: Paul  
Maolai.



## bemobile

# PAINIM BAL RESIS!

Putim mak (X) long wanem hap yu ting bal i stap long en na salim i kam long:

**Bemobile  
PAINIM BAL RESIS  
WANTOK NIUSPEPA  
P.O. Box 1982 Boroko,  
NCD  
Port Moresby.**

Bai yu gat sans long winim **sampela gutpela prais** i kam long Bemobile na **K100** i kam long Wantok Niuspepa long wanwan mun.

Lo bilong resis:  
Ol wokmanmeri bilong Wantok Niuspepa no inap pilai long dispela resis. Wantok Niuspepa tasol bai i makim wina. Nogel potokopi.  
Taim bilong dro em bihain long foapela wik bai ol i droim wina na nupela pilai bai i stat gen. Nem bilong wina bai kamaut long pepa neks wik bihain long dro.

### bemobile WANTOK

Nem:.....Krismas.....

Atres:.....

Phone namba:.....

**Yu baim pepa long we?**

Long strit/ rot/ stua:.....

Kaim na salim i kam

**Telikom Port Moresby Soccer Association  
Sarere Septemba 26, 2009**

<b>Bisini 2</b>			
0800	PJB Warriors	vs	Bavaroko Y3
0900	ATW Sky Hawks	vs	Gurias Y2
1030	Morobe United	vs	Naniu D4
1200	Quendo Nembo	vs	Keleiruna D2
1400	Guria	vs	PNG Gardener WP
1600	LBC Defence	vs	Hardrocks D1
<b>Sande Septemba 27 2009</b>			
<b>Bisini 1</b>			
0900	Kurtin Andra	vs	CSU Thrillers Y3
1030	NNL Musa United	vs	PNG Fire Y2
1200	DBTI	vs	A Natuna D3
1400	Mungkas	vs	Murik United W1
1600	Raitman	vs	Muijah Brothers D2
<b>Bisini 2</b>			
0900	Biniku	vs	Manena D4
1030	Kumusi	vs	Miga D3
1200	ATW Skyhawks	vs	Murat W1
1400	Lamana GFN	vs	Mungkas WP
1600	CSU Thrillers	vs	D1

**Ol 4-pela tim husat i win bai go insait long fainol. Sanap bilong fainol em olsem: (1 vs 3) na (2 vs 4).**



# bemobile Kap Nius

## Mago amamas long lus

Andrew Molen i raitim

**ROMULUS Mago i no wari tumas long Agmark Gurias i lusim laspela gem bilong ol long bemobile kap resis agensim Masta Mak City Rangers long Mosbi las wik.**

Em i bilip olsem dispela lus i gutpela long ol na bai helpim ol insait long fainols resis we bai stat dispela wiken.

"Mi ting em i gutpela long mipela i lus nau bilong wanem em bai helpim mipela long luksave long ol asua bilong mipela na stretim bipo long fainols i kamap," Mago i tok.

"Em i gutpela long mipela i lus nau na i no long fainols, mipela i luksave long asua bilong mipela," em i tok.

Rangers i daunim Gurias 22-12 tasol Mago i bilip ol bai bungim Rangers gen long fainol.

"Mi gat bilip olsem mipela bai go long gren fainol na bungim Rangers gen long hap," em i tok.

Gurias i bin winim Rangers long namba wan taim tupela i pilai dispela yia tasol nau Rangers i kam bek strong na bekim dispela dinau.

Rangers i putim 4-pela trai na Gurias i bekim tripela tasol.



STRONGPELA RAN: Gurias i no bin inap long stopim ol Rangers. POTO: Andrew Molen.

Rangers huka, Benjamin John Thomben husat i putim wanpela trai, i wok long ron aut long dami hap na kisim planti spes bilong tim bilong em.

Dispela i mekim ol Gurias i wok long go bek na i nogat

taim long sanap gut na was long ol.

Tasol tupela trai bilong ol Gurias tu em refri Moses Tolingling i no givim long ol.

Wanpela bal em i go fowet na narapela em ol i pundaunim

taim ol i go daun long trai lain stret.

Gurias i pinis long namba wan ples yet na Rangers i sanap long namba tri bihain long laspela raun.

## Bemobile makim nupela trofi

BEMOBILE i makim wanpela sumatin husat i winim resis long droim piksa bilong nupela trofi bilong PNG nesanel ragbi lig resis, Bemobile kap.

Bemobile bai tokaut long nem bilong dispela sumatin long wik i kam.

Dispela sumatin husat i winim bikpela resis bai kisim K10, 000 prais mani na skul bilong em bai kisim K25, 000 bilong ol samting bilong skul.

Tripela jas husat i makim wina em Bemobile CEO, Roger Blott, siaman bilong PNGNRL, Don Fox na Jenerel Menesa bilong PVM, Justin Kili.

Ol i makim dispela wina namel long planti tausen husat i salim piksa bilong ol tu i kam.

"I no isi long makim dispela wina bilong wanem i gat planti gutpela piksa olgeta i salim i kam," Fox i tok.

Long dispela tasol na Blott i tok ol bai makim ol wina bilong wanwan rijen bilong kantri we bai lukim dispela 4-pela sumatin tu i kisim sampela prais bilong ol na skul bilong ol.

Bemobile i statim dispela resis long stat bilong dispela yia long olgeta sumatin i mas resis long kamapim nupela trofi bilong Bemobile kap resis.

Dispela piksa ol i makim pinis bai go long ol save man long stretim insait long kompyuta na bihain bai ol i bihainim dispela piksa long mekim trofi tru bilong gem.

"Wok bai pinis na kap bai redi long gren fainol long Oktoba 18," Kili tok.

## Muruks bai pait strong yet

Bustin Anzu i raitim

**SBS MURUKS i amamas long ol i stap insait long fainols resis bilong Bemobile kap, we bai stat dispela wiken.**

Insait long namba tu raun bilong Bemobile kap, ol i no wokim gut na ol i wok long surik i go daun long leda na planti ol sapota na sponsa tu i wari olsem ol bai mekim wanem.

Tasol, insait long las tupela gem, Muruks i winim tupela gem na dispela i oraitim ol i go insait long fainols.

Tasol dispela wok-abaut bilong ol i go insait long fainols, ol i ken amamas long ol narapela tripela tim husat i no stap insait long dispela resis.

Ol i no winim ol pilai bilong ol na dispela i givim bel isi long Muruks long stap isi tasol na winim spes long fainols.

Long las gem bilong ol wantaim Bintangor Eagles, ol i pilai gut in-

sait long las 20 minit long winim dispela gem.

Ol mangi Hagen i save olsem ol bai nogat sans long fainols olsem na ol i pilai strong tru na dispela i lukim skoa i sanap 10-10 long hap taim.

Tasol taim ol i go insait long namba tu hap bilong gem bihain long kisim sampela skul tok long kosa Stanley Hondina, ol Muruks i mekim sampela bikpela ran na takol we ol Eagles i no inap stopim.

Ol i putim narapela 28 poin long winim Eagles 38-18.

Dispela tim, husat i winim tripela taitol pinis aninit long namba wan sponsa bilong gem, SP Brewery, bai taim long kamap namba wan tim long winim dispela taitol gen aninit long Bemobile sponsa.

Maski Sauten Hailans i stap longwe na wok bilong gavman, misin na ol arapela sevis i no ron gut bi-

hain long bikpela pait sampela yia i go pinis, dispela tim i bringim gutpela sindaun na wanbel long ol i mas i go bek na kirapim ples na kamapim gutpela sindaun.

Na wantaim Muruks i stap insait long fainols, provins bilong ol wantaim ol pipel bai bung gen long sapotim ol long mekim namba 4 win.

Dispela wiken, ol bai bungim Masta Mak City Rangers.

Tim husat i lusim dispela pilai bai pinis long fainols resis.

Rangers i gat olgeta pilaia bilong ol i stap tasol sampela bai no inap long kisim fil bilong wanem ol i stap insait long Prime Ministers 13 Kumuls tim dispela wiken long Mosbi.

Muruks tu bai lusim sampela ol pilaia bilong ol i go long Kumuls tasol tupela tim wantaim i gat ol pilaia husat bai kisim ples gut.

Long gem namel

long ATCL Bombers na Bintangor Lahanis, Bombers i hangamapim su bilong ol long dispela yia.

Dispela win bilong Lahanis i putim ol long gutpela mak we ol bai bungim namba tu ples tim, Toyota Mioks.

Lahanis ino pilai gut insait long namba wan hap tasol long namba tu hap, ol i mekim sampela senis na i pilai gut tru.

Bombers inap long wokim gut long dispela yia sapos ol i bin painim sponsa hariap na redim ol yet gut.



# bemobile Cup 2009



"Kisim FRI K5 Prepaid  
kad long geit taim yu baim  
wanpela 'K10 Adult' tiket"

## -PROFAIL-

De mama karim: Februari 21, 1984.  
Longpela bilong em: 176cm.  
Hevi bilong em: 89kg.  
Provins: Is Niu Briten (ENB).  
Posisen: Senta.  
Fevret NRL pilaia: Steve Matai.  
Fevret NRL tim: Manly-Warringah Sea Eagles.  
Fevret PNG pilaia: Jessie Alunga.  
Narapela spot yu save laikim: Boksing.  
Bikpela salens bilong yu: Long kamap wanpela gutpela man bihain taim we ol manmeri bai gat respek long mi.  
Astingting bilong yu long gem na laip: Long kamap wanpela gutpela piksa bilong ol arapela long bihainim.  
Liklik toktok bilong ol yangpela: Noken kisim drak na bikhet. Harim tok bilong mama papa na traim long kamap gut.

romulus

# MAGO

Agmark

Gurias



bemobile

Official Sponsors of the PNGNRL

PO Box 1055 Waigani, NCD. Ph: 325 9400. Fax: 325 9428.

# Solomon ailan rausim nem long Pasifik gems resis

Andrew Molen  
i raitim

SOLOMON Ailans i rausim nem long wantaim PNG na Tonga long holim 2015 Pasifik gems long kantri bilong ol.

Presiden bilong Nesenel Olimpik Komiti bilong Solomon Ailans (NOCSI), Fred Maetoloa i salim wanpela pas we i tokaut long dispela i go long Presiden bilong Pasifik Gems Kaunsil (Pacific Gems Council) o PGC, Vidhya Lakhan las wik Trinde.

NOCSI na PGC i no tokaut long wanem as tru Solomon Ailans i mekim

dispela tasol vot bilong makim kantri husat bai holim gem, bai kamap dispela Sande long Nu Kaledonia (New Caledonia).

Ol i no bekim tu ol askim bilong *Wantok* taim mipela i raitim dispela stori na tu mipela i no bin inap long toktok wantaim bosmeri bilong komiti bilong PNG, Mel Donald husat i go pas long putim PNG insait long dispela resis.

Tasol i gat bilip olsem sans bilong PNG long dispela resis i gutpela bilong wanem nau bai ol i resis wantaim Tonga tasol long winim dispela vot.

Sekreteri Jenerel bilong PNG Spots Federesen na Olimpik Komiti (PNGSFOC) Se John Dawanicura i askim long ol arapela Pasifik kantri olsem, sapos ol i laikim PNG long win orait ol i mas makim ol long namba vot.

PNGSFOC wantaim komiti bilong Donald i bilip strong olsem PNG bai winim vot bilong wanem ol i gat gutpela sapot bilong nesenel gavman, ol bisnis komyuniti na tu long ol manmeri bilong PNG.

**TOKSAVE:** Lakhan i kisim toksave long NOCSI olsem ol bai no inap resis moa



RON: Kevin Vitolo bilong Royals i train long brukim takol bilong wanpela Harlequins pilaia long gem bilong ol las wik.

## Namba 12 fainol bilong Royals

DISPELA yia em namba 12 taim bilong Consort Royals long go insait long gren fainol bilong Lae ragbi yunion resis.

Ol i kisim dispela sans gen bihain long ol i winim Harlequins 27-0 las wiken.

Long wik i kam bai namba 12 taim bilong ol long go insait long gren fainol na nogat tim i winim ol yet long dispela bikpela gem.

I gat planti nupelapes insait long Royals tasol dispela ino senisim wanpela samting long tim, wankain pilai na stail i stap yet wantaim ol.

Olpela fowet na nau kosa Julius Tingereng i tok ol i gat planti nupela mangi tasol dispela ino senisim pasin na stail bilong pilai bilong ol.

Ol i bihainim ol olpela pilaia na strongim tim tasol.

"Planti ol mangi i lusim klab na i go long narapela o risain long wanem taim bilong ol long pilai pinis.

"Tasol i gat ol yangpela i kamap na ol i holim klab i stap yet," Tingereng i tok.

Risev gret bilong ol tu i stap insait long fainols long wik i kam.

## Ol asples train Kangaroos

- ikam long pes 32

Dispela em namba 5 yia bilong dispela resis namel long PNG na Australia we i save kamap olgeta Septemba long makim independens bilong PNG na tu strongpela wokbung namel long dispela tupela kantri.

Australia bai yusim dispela gem long kisim ol pilaia bilong Kangaroo tim bilong ol na PNG tu bai makim ol Kumul pilaia husat bai stap insait long Pasifik Kap resis long Oktoba.

PNG tim em; Anton Kui (SBS Muruks), Benjamin John Thomben, Simon Young na Nixon Kolo (MMC Rangers), Kevin Frank, Elijah Riyong (Vipers), Kerry Tapako (Mioks), Dion Aiye, George Moni, Rodney Pora, Larsen Marabe (Guria), Glen Nami na Sigfred Gande (Bintangor Lahanis) em ol Bemobile Kap pilaia.

Ol ovasis pilaia long tim em; Tu'u Maori, Tommy Butterfield, Rodney Griffin, Tyson Martin na Keith Peters. Kosa em Adrian Lam na namba tu kosa em Jim Williams.

Australia PM 13 tim em; Josh Dungan (Canberra), Nathan Merritt (South Sydney), Michael Jennings (Penrith), Joel Monaghan (Canberra), David Williams (Manly), Terry Campese (Canberra), Jonathan Thurston (North Queensland), Petro Civoneceva - kepten (Penrith), Robbie Farah (Wests), Keith Galloway (Wests), Trent Waterhouse (Penrith), Luke O'Donnell (north Queensland), Paul Gallen (Cronulla).

Intasenis em; Luke Lewis (Penrith), Dave Shillington (Canberra), Nate Myles (Roosters), Tom Learoyd-Lahrs (Canberra) na Adam MacDougal (Newcastle).

## Karate holim gutpela sempionsip

Bustin Anzu  
i raitim

NAMBA 18 Karate sempionsip long Lae, Morobe provins, i bin kamap gut tru olsem ol i bin tingting long en, maski nogat planti taim, ol opisel i tok.

ELEVENPELA klab long kantri i bin soim pes long dispela tupela de resis we Papua Niugini Karate Federesen (PNGKF) i bin holim.

Resis administreta, Sensei John Watah, i tok ol i lusim dispela pilai longpela taim tru na em i gutpela long ol i kirapim bek.

"Mipela i bin lusim dispela pilai samting olsem 5-pela yia i go long wanem mipela ol lain i go pas long dispela ol pilai no stap long ronim Karate.

"Tasol nau mipela i kam bung gen long ronim ol dispela pait gen na dispela pait em i namba wan bikpela pait long planti bai kam bihain," Watah i tok.

Em i tok ol lain bilong pait i amamas long dispela resis maski nogat inap taim. Ol i les long stap nating na olgeta i kam sapotim dispela pilai.

104 paitmanmeri i bin soim pes we 8-pela em ol meri.

Ol dispela lain bilong pait i kam long 11-pela klab long kantri, olsem long Manus provins na Karkar long Madang provins.

Long dispela ol pait, Watah i tok ol i larim ol Anda 12 tu long pilai. Dispela em long kisim o pulim tingting bilong ol liklik pikinini tu long pilai na strongim Karate long kantri. Lae i bin i gat planti ol lain



SALENS: Man i winim silva medol long 51-54 wet grup, Timothy Aloware (raithan) bilong Goroka i train long abrusim han bilong Emil Gulupau bilong RAM Karate klab bilong Lae.

bilang pait long wanem ol i holim dispela pilai.

Ol i bin i gat 7-pela klab, Karkar na Mosbi i gat tupela, na Popondetta, Goroka na Manus i salim wanwan klab i go.

Ol i bin pait long tupela grup - ful kontek (full contact) na poin kontek (point contact).

Ful kontek em long tingim wanpela paitman husat i bin statim Karate long kantri, Sensei Fonte Seming. Em wanpela biknem paitman na man husat i bin givim taim bilong em long dispela pilai i mas i go long olgeta hap long kantri.

Ful kontek pait em long kisim poin na stap insait long seleksen sapos i gat ol arapela bikpela pilai olsem long PNG Gems, Pasifik Gems, Osenia, Komenwelt o ol arapela bikpela pait.

Nigel Bana bilong Mosbi kisim awot bilong olgeta pait olsem wanpela gutpela paitman long ful na poin kontek divisin.

Ol narapela em John Saku bilong Lae Royals husat i kisim brons long gutpela paitman husat i bin pait wantaim tingting long sinia divisin long ful kontek.

Wasik Sukap bilong Karkar i kisim wanpela brons long junia grup, taim Kori Martin bilong Popondetta i kisim brons bilong em long spesol grup olsem spotman bilong dispela resis.

Long Anda 12, ol paitman bilong Karkar ailan 1 i soim ol strong na stail bilong ol long dispela tupela de.

Nanai Darwin i kisim gol, Christah Mulong i kisim silva na brons i go long Kelyn Dungong.



# Mosbi redi long winim Lae

Andrew Molen  
i raitim

NESENEL Kapitel Distrik (NCD) Gavana, Powes Parkop, i namba wan man long tromoi toktok long statim paitim tok bilong PNG gems.

Na namba wan toktok em i tromoi, em i go long stret long Morobe Gavana, Luther Wenge na tim bilong em.

"Mipela i redi long winim Lae (Morobe) na ol arapela provins husat i kam pilai long hia long Novemba," Gavana Parkop i tok long Mosbi dispela wik Mande.

"Mipela inap long wanem kain salens ol arapela provins i tromoi long mipela," em i tok.

Gavana Parkop i tok Tim NCD i gat olgeta samting ol arapela provins i gat long en olsem na em i bilip NCD gat bikipela sans long win.

"Sapos yupela i gat ol bikipela Hagen man o ol ain man bilong Sepik i stap, mipela tu i gat.



**REDI:** Gavana Parkop (lephan) na Sir Henry Chow bilong Lae Biscuit, i givim mani long ronim PNG gems.

"Sapos yupela i gat ol longpela Markham man o spitman bilong Tolai o ol gutpela soka pilaia bilong Finchafen, mipela tu i gat ol soka pilaia i stap long

9 mail na ol Tolai na Markham bilong mipela i stap," Gavana Parkop i tok.

Em i tok Morobe wantaim lsten Hailans tasol i wok long

winim ol dispela gem olsem na em i taim bilong NCD long rausim dispela taitol long ol.

Morobe tim i holim dispela taitol nau bihain long ol i winim laspela gem long Lae long 2007 na i toktok strong olsem ol bai kam na winim gen long Mosbi dispela yia.

Gavana Parkop i makim tu NCD Komisnin (NCDK) long givim K307, 385 i go long oge-naising komiti long Mande long ronim dispela tonamen.

Long wankain taim, Lae Biscuit kampani long Mosbi tu i putim narapela K100, 000 antap long dispela.

Siaman bilong Ogenaising Komiti, Jack Pidik, i tok Is Nu Briten tim tu i wok long skin kirap long kam long dispela pilai.

"Ol i tokim mi olsem ol i no laik wet moa na i laik kam hariap tasol long pilai," em i tok.

Pidik i tokaut tu olsem Air Niugini givim tok orait long daunim prais bilong ol long olgeta tim husat bai kam long pilai.

## Magani bai bungim Royals long LRL fainel

**TUPELA** i bin pilai pastaim long wanpela tim long beklain sampela yia i go pinis.

Nau, tupela i bruk na pilai long narapela tim.

Na taim tupela i pilai long wanpela tim, tupela wantaim i no pilai long gren fainel.

I kam inap nau, tupela bai pilai long gren fainel olsem ol kosa.

Dispela tupela bipo pilaia em bipo Lae Bombers fulbek, Michael Moses, na bipo Lae Bombers winga Peter Kennedy.

Moses bai kisim olpela tim bilong tupela, Good Samaritan Magani, i go insait long gren fainel long bungim Kennedy wantaim PNG Toner na Ink Saplai Royals long Lae Ragbi Lig (LRL) gren fainel.

Dispela em namba wan taim long Magani long stap insait long wanpela gren fainel na tim i amamas na wet tasol long pilai.

Magani em wanpela olpela klab insait long LRL we i stap long taim bilong ol waitman yet i kam.

Tasol taim ol waitman i go pinis nau ol asples i kisim na kolim Magani.



**NAMEL MAN:** David Kadata bai ronim bal bilong Royals namel long fil taim ol i bungim Magani long fainel.

Long 2002 Magani i bin ol maina primia tasol ol i no pilai insait dispela gren fainel.

Ol i bin lus long ol Panthers. Dispela em taim Moses na Kennedy i bin laik pilai tasol ol i no strong na i lus.

Royals i bin pilai long gren fainel long 2001. Tasol dispela em longpela taim i go pinis na dispela gren fainel nau em i olsem nupela long ol.

Magani, husat i bin stap namba 5 ples bihain long fainel 5, em i rausim narapela tripela tim long kam stap insait long ol gren fainel.

Ol i bin rausim Bulldogs pastaim, bihain Panthers na las

wik ol i stopim tim i winim gren fainel las yia, Kamkumung Crushers. Nau ol i lukluk long rausim Royals long kisim bikipela trofi.

Long sisen, Magani na Royals i bung tupela taim na Royals i winim wanpela na dro long narapela. Olsem na Magani i gat dinau i stap wantaim ol mangi long Bumbu bareks.

Kennedy i save wanem samting long mekim long stopim olpela tim bilong em. Em i kamap wantaim sampela gutpela tingting na ol i wok long winim ol pilai i kam na em bai yusim wankain plen long salim Magani go aut han nating.

## Lae Biscuit Poro, nupela king bilong Momase soka

Bustin Anzu  
i raitim

LAE Biscuit Poro bilong Lae Futbol Asosiesen (LFA) em nupela king bilong soka long Momase.

Na susa tim bilong ol long LFA yet, Bara, em kwin bilong Momase.

Poro i bin winim narapela birua tim bilong ol long LFA, City United, 1-0 long gren fainel na Bara i rausim trausis bilong susa tim long Lahi, Mungkas 2-0.

Nau bai Poro, City United, Bara na Mungkas i makim Momase long nesenel klab sempionsip long Mas, 2010.

Poro na United i luk olsem ol bai go insait long narapela ekstra taim na tupela i yusim olgeta strong bilong ol long 4-pela de bilong pilai.

Tasol Raymond Gunemba bilong Poro na gol kipa bilong United, Anton Pipi, i mekim gem i stap laip yet.

Gunemba i sutim sampela strongpela gol

i go long umben bilong United tasol Pipi rausim olgeta bal.

Tasol dispela gol long 65 minit em Pipi i no inap long stopim na dispela i givim taitol long ol mangi Lae Biscuit.

Gunemba na Pipi i save stap long Mosbi long pilai wantaim nupela tim, CMSS Tigers insait long Nesenel Soka Lig (NSL).

Klab i tok orait long tupela i kam long pilai long klab bilong tupela long LFA long dispela bikipela resis.

Long ol meri, dispela gren fainel i bin stap namel long LFA na Lahi we Bara bilong LFA i yusim bikipela save long ol long pilai wantaim sapot bilong ol manmeri long winim dispela pilai.

Dispela 4-pela de sempionsip i kisim ol tim i kam long Madang (4), Wau (2), Bulolo (2) Lahi (4) na LFA (6).

Sandaun na Is Sepik i no soim pes long dispela pilai resis we i kamap long Lae, Morobe provins.



## Kirapim bek ol hai skul spots resis

SAPOS ol nesenel spot federesen bilong wan wan spot i laik painim ol gutpela yangpela manmeri bilong spot bilong ol, ol i noken wari long go longwe long painim ol.

Wanpela ples ol i ken go long painim dispela kain ol spotsmanmeri em long ol inta hai skul o spots kanivel (Inter-High School Sports Carnival).

Planti ol pilai save kamap long dispela taim na planti ol gutpela spot manmeri save soim strong bilong ol tu long dispela taim.

Dispela em i wanpela gutpela taim stret long luk-save long ol dispela yangpela spots manmeri.

Mi no harim yet olsem wanpela nesenel spots federesen i gat tingting long go bung wantaim ol lain long edukesen opis long kamapim wanpela kain wokbung o program long lukluk long ol sumatin husat i stap insait long dispela ol spots.

Mi save olsem Edukesen dipatmen bai amamas long stap insait long dispela kain wokbung long strongim wok bilong en long ol praimer na hai skul we ol i save kisim skul long pilai spots na eksesais tu.

Ol provinsal edukesen divisen i mas traim na kamapim sampela kain wokbung olsem wantaim ol provinsal spots opis bilong ol.

Wanpela hevi long dispela em planti ol spots opis i no wok gut moa o i nogat ol gutpela save manmeri bilong mekim dispela kain ol wok i stap.

Bikipela samting we mi lukim inap kamap em ol dispela nesenel federesen i no save salim ol teknikal spots opisa bilong ol i go aut long ol provins na distrik long luksave na kisim ol dispela spotsmanmeri.

Mi lukim olsem ol i save kisim planti mani long mekim dispela ol wok tasol dispela ol wok i save kamap long ples we dispela ol nesenel spots federesen i kamap long en tasol.

Sampela taim ol i no save gat inap mani long raun i go long ol arapela provins long kamapim dispela kain ol wok.

Taim ol i save olsem ol i gat wanpela pilai o raun i go long ovasis, ol i save holim pasim olgeta mani long go long dispela intanesenel wokabout.

Dispela em i tru na mi save planti bilong yupela ol manmeri long pablik bai bilip long toktok bilong mi.

Tasol taim ol i kam bek long dispela ol raun long ovasis ol i save painim olsem ol i nogat nupela man o meri moa long trenim bilong wanem ol i no bin painim ol yangpela manmeri bipo na redim ol i stap.

Astingting bilong mi em olsem, olgeta spots i mas mekim pasin bilong wokbung wantaim ol arapela otoriti olsem wanpela bikipela hap wok bilong ol.

Wanpela kain tok piksa bilong dispela em nau wol sempion pawa lifta bilong yumi, Dobi Mea, husat i mekim toktok bilong em long hia las wik.

Sapos Mea i sik o i kisim bagarap o i pundaun na dai tumora bai husat narapela i stap redi long kisim ples bilong em?

Narapela gutpela piksa em sempion wet lifta bilong yumi, Dika Toua.

Gem bilong Toua i no strong tumas olsem bipo, em i wok long go daun nau. Bai yumi painim husat long kisim ples bilong em?

Dispela em astingting bilong toktok bilong mi olsem na mi singaut long olgeta nesenel spots asosiesen na federesen long lukluk gut long dispela na kamapim wok long stretim nau.

Go sekim ol hai skul spots resis nai bai yu ken painim planti ol gutpela yangpela spotsmanmeri husat inap kisim ples bilong ol sinia etit bilong yumi nau

**INSAIT**

**Solomon ailan rausim nem long Pasifik gems resis. PES 30.**

.....

**Mosbi redi long winim Lae - Parkop i tok. PES 31.**



# Ol asples train Kangaroos

**14 PNG pilaia insait long Kumul tim**

**Andrew Molen i raitim**

(Agmark Gurias) em tripela nupela pilaia ol selekta i kisim i go insait long Kumul skwat dispela wik Tunde long kisim ples bilong ol dispela ovasis pilaia.

Dispela bai namba wan taim tu bilong dispela tripela pilaia long putim yunifom bilong ol Kumul.

Long ol ovasis pilaia, Tyson Martin, husat i save pilai long anda 20 bilong North Queensland Cowboys long Australia bai i kam pilai.

Long wankain taim, Australia bai salim wanpela strongpela tim we sampela ol biknem olsem Petro Civoneceva, Jonathan Thurston, Paul Gallen, Adam MacDougal, Nathan Merritt na Robbie Farah bai kam.

Dispela em namba 5 yia bilong dispela resis namel long PNG na

**... i go moa long Pes 31.**



**NUPELA MAN:** Elijah Riyong em wanpela bilong ol PNG pilaia husat i stap insait long Kumul tim we bai pilai agensim Australia PM's 13 dispela Sande long Mosbi. Dispela bai namba wan Kumul gem bilong Riyong.

**PAPUA Niugini (PNG) Praim Ministas 13 Kumuls tim bilong dispela yia i gat 14 asples PNG pilaia na 5-pela ovasis pilaia i stap insait long en.**

Dispela tim bai bungim PM's 13 tim bilong Australia dispela Sande long Mosbi.

PNG tim i sanap olsem bihain long ol ovasis pilaia olsem Menzie Yere, Charlie Wabo na Makalie Aizue na Stanley Gene i no inap long kam.

Gene i bin laik kam na pilai wanpela moa taim bipo em i pinis tasol dispela bai no inap kamap.

Gold Coast Titans winga, David Mead tu bai no inap kam pilai bilong PNG long wanem em i kisim bagarap.

Elijah Riyong (CIV-PAC NCDC Vipers), Kerry Tapako (Toyota Mioks) na Dion Aiye

## Johnston's Pharmacies

**For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.**

**All Sport and First Aid requirements.**

**P.O.Box 1066 Boroko. Phone 325 3185. Fax 325 0190. Email sales@johnstons.com.pg."**